


ইশ্বরকবী

ভাবানুবাদ
শ্রী ইন্দ্রকুমার সিংহ



ঈশ্বর বাণী

শ্রীভগবান্ বেদব্যাসর লেংকরা

শ্রীমদ্ভগবদ গীতার বিষ্ণুপ্রি়া মণিপুরী

ঠারে সংকলিত

ভাবানুবাদ

শ্রীইন্দ্রকুমার সিংহ

প্রথম সংস্করণ—

১৯৯২ ইংরেজী

জুন



পূর্ণিমা লেইরিক লেইসাঙ

জ্যোতিনগর, গোহাটী-২১

প্রচ্ছদ : শ্রীকান্ত সিংহ

ছাপা :

সু. প্রিন্টার্স

জ্যোতিনগর

মূল্য : ২০.০০

উন্মোচক

শ্রী ইন্দ্রকুমার সিংহ

(সাইট - ৭)

২০/৮/৯২

শ্রী ইন্দ্রকুমার সিংহ

২০/৮/৯২

ভগবান শ্রীকৃষ্ণের লাংকরিয়ার
তা'রে সেবা করিয়ার—হমা দিয়ার
ভক্তি করিয়ার বারো নিংকরিয়ার

কিস্তমান

তা'জীব হাবিরে কিহান উপদেশ দেছিল
উহান হারনাপেয়া তা'রে লাং করাণির
কোন গুলা আছেতা ?

শ্রীকৃষ্ণই জীব হাবিরে উমরকার
যে মিঙালপা পথগো ইলকরে দেছে
ও পথ উঁগে—

‘দৈশ্বর বাণী’

‘ঈশ্বরর বাণী’ লেখিক এহান নিকালানিঃ যে যে গিরিগিধানীর
দান পেইলাং তাহুর শুভ কামনা করিয়ার—

- ১। শ্রীমলিনী কান্ত সিংহ, এম, এ, প্রফেসার আইজল
- ২। শ্রীপুলিন সিংহ, বি এস্ সি (এগ্রি.) নরসিংপুর
- ৩। শ্রীমনিষ্ট্র কুমার সিংহ আই, এফ, এস, ঐ
- ৪। শ্রীমৌর সিংহ, বি, এস্ সি, ডিফু
- ৫। শ্রীমথুরা সিংহ, বি, এস্ সি, ম্যানেজার এলাহাবাদ বেঙ্ক,
লংকা
- ৬। শ্রীসাধন সিংহ, বি, এ, অ্যাকাউন্ট্যান্ট, কাটিগড়া
- ৭। শ্রীমনোরঞ্জন দেব, অ্যাকাউন্ট্যান্ট, করিমগঞ্জ
- ৮। শ্রীকল্যান ব্রত মেচ, ব্রক ডেভলাপমেন্ট অফিসার, হামরেন
- ৯। শ্রীনামদেব সিংহ, এম, এ, প্রফেসার, হাফলং কলেজ
- ১০। শ্রীকৃষ্ণধন সিংহ, মার্চেন্ট, কাবুগঞ্জ বাজার
- ১১। শ্রীজীতেন্দ্র কুমার সিংহ, বি, এ, বিটি, হেডমাষ্টর, নেহেরু
হাইস্কুল, সিঙ্গারী
- ১২। শ্রীরঙ্গলাল সিংহ, ব্রক ডেভলাপমেন্ট অফিসার, রংখাং,
কার্বি আংলং

ভূমিকা

গীতা গ্রন্থ বিষয়লো হুরা করে মাতানিরতা কিস্তাউ নেই।
বিশ্ব বন্দিত এ মহামুলা লেরিক এহানরে পৃথিবীর হাবি জাত
হাবি দেশে স্বীকৃতি দেছিহান। পূর্ণজ্ঞান বারো তত্ত্বর অমৃতর
কলগোর সাদে বিরাজ করিয়া আছে।

বেদ, বেদান্ত, উপনিষদ, পুরাণ ইতিহাস এতা কিতা ভারতর
জ্ঞান বারো তত্ত্বর মিঙালপা অধ্যায় আহান সৃষ্টি করিয়া থ’
গেছেগা কিস্তমান এতা হাবির অস্তিত্ব সব্বেউ গীতাহানর আলাদা
সত্তা আহান আছে। কিয়া বুঝে, গীতার বাক্য স্বয়ং ভগবান
শ্রীকৃষ্ণর শ্রীমুখত পুরি অমৃত ধারা অয়া লামেছেতা। উহানেতে
এহানর গুরুত্ব অসীম বারো আরার লেরিকেত তঙাল।

এ মহিমাময় গীতা গ্রন্থ এহান পৃথিবীর হাবিহানর সম্পদহান
অগেলেগাউ আমার বিষ্ণুপ্রিয়া মনিপুরী জাতি এহানাং এহানর
আলাদা ডাঙর বারাআহান আছে। ভগবান শ্রীকৃষ্ণই তার
তত্ত্ব এহান পয়লাই অর্জুনরাং মাতেছিলহান। আমি চন্দ্র-
বংশীয় অর্জুনরে আমার বংশর মূলাধার লেপকরিয়া বিষ্ণুর প্রিয়
অর্জুনর নাঙে নিজরে বিষ্ণুপ্রিয়া বুলিয়া পরিচয় দিয়ার বারো
অর্জুনর বংশ বুলিয়া গর্ব করিয়ার।

ভগবান শ্রীকৃষ্ণই নিজে গীতাহানাং মাতেছে—‘পাণ্ডবরমা
মি অর্জুন’। শ্রীকৃষ্ণ বারো অর্জুন যেন আত্মা আগো! উতার
গঞ্জে অর্জুনরে কতিহান বানা পাছিল উহান তলর ইকরা

শ্রীকৃষ্ণর বাক্যহানে প্রমত্ত করেন—“হে অর্জুন মোরাং মনহান কাংকর, মোরে নিংকর, মোরে পূজা কর, মোরে হমাদে, মি হস্তোমেউ সেত্যা করিয়া মাতৌরিতা, তি মোর নিয়াম হুংশি-পাগো—মোর কথা ইলয়া চললে মোরে পায়িতেইগা।” (মোক্ষ যোগ—৬৫) এসাদে উক্তি ঈশ্বর নিজে আমার বংশর আগরাং মাতেছিল উহান আমার পরম ভাগ্য বুলিয়া নিংকরিয়ার। ঐ সূত্রলো গীতা শাস্ত্রর জ্ঞান, তত্ত্ব, অর্জুনর বংশ হিসাবে প্রত্যেক বিষ্ণুপ্রিয়াই হারপানি থ’কছে বুলিয়া বিশ্বাস করৌরি। এ বিষয়ে ভক্তি বেদান্ত গিরকর উক্তি আহান প্রকাশ করলে আরাকৌ হবা অয়তৈ। গিরকে ‘ঈশোপনিষদ’ ভাষ্য করতে গিয়া আকপেইং মাতেছে—‘ভগবানে অর্জুনরে স্পষ্ট করে মাতেছে তার সাদে পরম ভক্ত বারো সখা অনার কারণেই অর্জুনরাং ভগবদ্ গীতার সিদ্ধান্ত হাবি বোধগম্য। অন্য কথাত ভগবানর ভক্ত বারো মাক্রপ নাইলে কোনগৌ গীতা হারপা নারের। এ কথা এহানে এহান হারপেয়ার যে, অর্জুনর পথ ইলকুরা মানুরেই ভগবদ্ গীতা হারপানি পারতারা’।

পুতকগোর পূর্ণ পরিচয় মালকগোর পরিচয়ে। মালক এগৈ ‘এগ তোর বাপকগো’ বুলিয়া যেহান পরিচয় দিতৈ উহানে পূর্ণ পরিচয়হান। উহানরমা কোন যুক্তি বা তর্ক নাখাটের—হায়হান বুলিয়াই যাকরানি লাগতৈ। কিয়া বুঝে, উহানর কোন বিকল্প নেই। ঠিক উসাদে, আমার সংস্কৃতি, আমার দর্শন আমার চিন্তাধারা আমার আচার বারো মানসিকতাই প্রমাণ করতৈ আমি অর্জুনর বংশ কিনা? উহানেতে অর্জুন বারো

শ্রীকৃষ্ণরমা আলোচিত পরম তত্ত্ব গীতাশাস্ত্র এহানর দর্শন বিষ্ণু-
প্রিয়া মণিপূরীর মূল দর্শনহান বুলেউ ভুল নাইতৈ ।

গীতার আলোচিত দর্শনর আগেই যজুঃবেদর ঈশোপনিষদে
ভগবান মহিমা প্রকাশ অছিল ১৮ হান মন্ত্রর ভিতরে । উহা-
নর পূর্ণ প্রমান ভগবান শ্রীকৃষ্ণই নিজে গীতার মাধ্যমে আরাকৌ
লিকুলির সাদে সেকরে প্রকাশ করে দিল ! এহান যেন উমরকার
সেতাহান হিসাবে অর্জুনরাং বীজ মন্ত্রহান করে বিলা দেছিল ।
এ সম্বন্ধে ভক্তি বেদান্ত গিরকে মাতেছিল—‘ব্যাসদেবর খাম-
তলর পরম পূর্ণ বারো উদাত্ত রচনা অইলতাই শ্রীমদ্ভাগবত ।
এহান বেদান্ত মন্ত্রর প্রামাণ্য ভাষ্যহান । উতার গজে স্বয়ং
ভগবানে মাতেছিল বারো মহামুনি ব্যাসদেবর সংকলন করা
ভগবদ গীতাত আছে । বারো এহানে হাবিস্তপূরি গুরুত্বপূর্ণ বারো
মহিমাময় শাস্ত্র । গীতা বা শ্রীমদ্ভাগবতর সিদ্ধান্তর বিরোধিতা
করানির মত কোন ভাষ্যই প্রামাণ্য নাইগে । (ঈশোপনিষদ)

আমার জাত এহানর একতার নিঙে কতহান সম্পদ মূল
ভিত্তি হিসাবে আমার আগেকার গিরীগিধানীয়ে থয়া গেছিগা—
১। হাবির পরিচয় ‘সিংহ’ ২। আকহান ঠার ৩। আকহান
ধর্ম ৪। আকহান ভাবধারা বারো সংস্কৃতি । উহানেতে নানান
তরেইর হাদিতৌ নিজর অস্তিত্বরে একাকা পেয়া জিঙতা করানির
পাংকাল পাগেছিগা ।

বর্তমান যুগে দলাগো মতবাদ উতার গজে দলাগো সয়ন্তু
ভগবান নিকুলিয়া নানান মতবাদ প্রচার করানিত লাগেছি ।

অবশিষ্ট যুগরপ্রভাবহান। বিষ্ণু পুরাণে বর্ণিত আছে—‘যেগোর
থতাং যেতা আহিতৈ উতাই শাস্ত্র বুলিয়া প্রকাশ অইতৈ।
নিজর নিজর মতানুযায়ী হাবিয়ে হাবি ছৌর উপাসনা করতাই
বারো হাবি আশ্রমে যথাইচ্ছা হমেইতাইগা (বিষ্ণুপুরাণ ৬ষ্ঠ
অংশ ১ম অধ্যায়—১৪)

উহানেতে গীতার প্রকৃত দর্শন হাবিয়ে হবাকরে ভৌ পেইলে
আরার মতবাদ আয়া আমারতারে দিশাহারা করে নারতৈ।
ধর্মরমা বিভাজন আমারাং ডাঙর আঘাত আহান আহিতৈ যেহানে
ভবিষ্যতে দলাগো সমস্যার সৃষ্টি করতৈ। এহানাং উল্লেখ করানি
য়াকরের—গ্রীক সভ্যতা বারো আর্ট (কলা) ধ্বংস অনার মূলে
খৃষ্টধর্ম। খৃষ্ট ধর্মই মূর্তিপূজা নাকরের, উহানেতে গ্রীকর মূর্তি
হংকরানির নৈপুণ্যতা ধর্মর কারণে ত্যাগ করতে বাধ্য অইলা।
উহানেতে এমন বিশ্বাস আইতে পারে যেতাই আমার সংস্কৃতির
ধ্বংসর বারাদে নিতৈগা। উহানলো আমার দর্শনর গঞ্জে
আমি পুংখাক বিশ্বাস থ’না লাগতৈ, যাতে আমারে কোনগৌ
ঘরলালটুম হংকরে নারতারা।

আমার জাতর উন্নতি করিক বুলেই মূল গুরিগং যানা
লাগতৈ। জাত আহানর আচেংপা সম্পদ অইলতাই জাতহানর
মানসিকাতা। মিঙালপা মানসিকতার গুণেই নিজরে জিঙতা
করানিত সমর্থ অইতারা। কিন্তুমান, মানসিকতা বাদ দিয়া হাবিতা
বৃথা। ঐ মানসিকতা একমাত্র গীতাহানে রক্ষা করে পারের
বুলিয়া বিশ্বাস থা’র।

লেরিক আহানে জাত আহানরে কতিহান পেয়া বিপদর
তরেইগত্ত রক্ষা করে পারের, উহানর অতি সার্থক দৃষ্টান্ত আহান
স্বামী বিবেকানন্দর বাণীত্ব তুলে দেওরি—

“যে সকল ধর্ম সম্প্রদায়ের একখানি গ্রন্থ আছে সেইগুলি ব্যতিত
সকল সম্প্রদায়ই লোপ পাইয়াছে। আপনাদের মধ্যে কেহ কেহ
পার্সীদের কথা শুনিয়াছেন। ইহারা প্রাচীন পারশ্যবাসী—এক
সময়ে ইহাদের সংখ্যা প্রায় দশ কোটি ছিল। আরবীয়রা
ইহাদের অধিকাংশকে পরাজিত করিয়া মুসলমান করিল। অল্প
কয়েকজন তাহাদের ধর্মগ্রন্থ (জেন্দ আবেস্তা) লইয়া পলায়ন
করিল এবং তাহারা সেই ধর্মগ্রন্থের বলেই এখনও টিকিয়া আছে।
ইহুদিদের কথা ভাবিয়া দেখুন যদি তাহাদের একটি ধর্মগ্রন্থ
নাথাকিত তাহারা জগতে কোথায় মিলাইয়া যাইত। কিন্তু
ঐ গ্রন্থই তাহাদের জীবনী শক্তি রক্ষা করিয়াছে। অতি ভয়ানক
অত্যাচার সত্ত্বেও তাহাদের ধর্মগ্রন্থ (Talmud) তাহাদিগকে
রক্ষা করিয়াছে।” ১।

(স্বামীজীর বাণী ৬ রচনা ৪র্থ খণ্ড)

এ প্রেরণা এহান অন্তরে থয়া গীতার কঠিন তত্ত্ব বাদ
দিয়া সাধারণ মানুষের নিজের মানসিকতা রক্ষা করতে যতিহানি
প্রয়োজন অতিহানি শ্লোক চৌরাপ চৌরাপ লয়া বারো উতার
ভাবর লগে মারেল ইলয়া “ঈশ্বরর বাণী” প্রকাশ অইল।
উদ্দেশ্য-সর্বসাধারণ মানুষ, ছাত্র-ছাত্রী যেন প্রেরণা পেয়া গীতা
শাস্ত্রর গজে শ্রদ্ধাবান অপারতারা।

এ লেরিক এহান ছাপানির হাবি দায়িত্ব মোর অমুজ প্রতিম
উদীয়মান কবি বারো শিল্পী শ্রীকান্ত সিংহরাং অর্পণ করেদিলু ।
তার সহযোগীতারকা মি আন্তরিকভাবে ধন্য ।

এবাকা বিংশ শতাব্দী খুঁজনির পথে । পৃথিবী হাপদিয়া
চলেছে, হত্যা, দলাদলি, লুণ্ঠন, হিংসা আশা-নিরাশার দলাগো
কঠিন সমস্তা ! আমার সাদে সংখ্যা কম জাত এহানে ডাকয়া
চেয়া আছি এযুগর মানুহর কর্ম ধারা । এতার হাদিৎ আমি
নিজর কর্তব্যরকা দিশাহারা যেন লাগেছে ।

এ দিশা মাংকরেছি তাঞ্জা এগৎ আমি মাকড়র সাদে
গীতারূপী জালহান বুনিয়া ঐ জালহানর ভিতরেই আমার জিংতা
অনির মাচাক যোগাড় করে পারতাঙাই বুলিয়া আশা খউরি ।
পররাং সাক্তি অইলেউ মালকগোরাং নিজর শৌগো যেসাদে হবা
উসাদে মোর সমাজ মোরাং হবা—ঠারহান ঠুমপা—সংস্কৃতি
গৌরবপূর্ণ—দর্শন অকৃত্রিম—তানুহর নিঙে লেরিক এহান কাৎকরলু ।

ফলহান ভগবানর শ্রীহস্তত ।

হরি ওঁ তৎ সৎ । ইতি

শ্রীইন্দ্র কুমার সিংহ

১৯৯০ ইং

THE NEW YORK PUBLIC LIBRARY
ASTOR LENOX TILDEN FOUNDATION
455 FIFTH AVENUE
NEW YORK 17, N. Y.
This book is loaned to you by the
New York Public Library
and is not to be sold, lent, or
otherwise disposed of without
the permission of the
Library. It is to be returned
to the Library on or before
the date stamped on the
title page. If you wish to
purchase this book, please
contact the Library.
The New York Public Library
is a non-profit corporation
organized in 1894. It has
a collection of over 25 million
volumes and is one of the
largest libraries in the world.
It is open to all and its
services are free of charge.

THE NEW YORK PUBLIC LIBRARY
ASTOR LENOX TILDEN FOUNDATION
455 FIFTH AVENUE
NEW YORK 17, N. Y.

NEW YORK 1966

87-1666

সূচীপত্র

		পৃষ্ঠা
প্রথম অধ্যায়		
॥ অর্জুন বিষাদ যোগ	॥	১
দ্বিতীয় অধ্যায়		
॥ সাংখ্য যোগ	॥	৫
তৃতীয় অধ্যায়		
॥ কর্ম যোগ	॥	৯
চতুর্থ অধ্যায়		
॥ জ্ঞান যোগ	॥	১৫
পঞ্চম অধ্যায়		
॥ কর্ম সন্ত্যাস যোগ	॥	১৮
ষষ্ঠ অধ্যায়		
॥ অভ্যাস যোগ	॥	২১
সপ্তম অধ্যায়		
॥ জ্ঞান বিজ্ঞান যোগ	॥	২৪
অষ্টম অধ্যায়		
॥ অঙ্কুর ব্রহ্মযোগ	॥	২৬
নবম অধ্যায়		
॥ রাজবিদ্যা-রাজগুহ যোগ	॥	২৮
দশম অধ্যায়		
॥ বিভূতি যোগ	॥	৩১

একাদশ অধ্যায়

॥ বিশ্বরূপ দর্শন-যোগ ॥ ৩৪

দ্বাদশ অধ্যায়

॥ ভক্তিযোগ ॥ ৩৮

ত্রয়োদশ অধ্যায়

॥ ক্ষেত্র-ক্ষেত্রজ্ঞ বিভাগ-যোগ ॥ ৩৯

চতুর্দশ অধ্যায়

॥ গুণত্রয় বিভাগ যোগ ॥ ৪৩

পঞ্চদশ অধ্যায়

॥ পুরুষোত্তম যোগ ॥ ৪৬

ষোড়শোহধ্যায়

॥ দেবাসুর-সম্পদ-বিভাগ যোগ ॥ ৪৮

সপ্তদশ অধ্যায়

॥ আত্মাত্রয় বিভাগ যোগ ॥ ৫১

অষ্টাদশ অধ্যায়

॥ মোক্ষ যোগ ॥ ৫৩

গীতা মাহাত্ম্য

৫৭

প্রথম অধ্যায়
অর্জুন বিষাদ যোগ

পাণ্ডব বারো কোরব দ্বিয পক্ষই লালফামরকা উবা অইলা ।
যুদ্ধর আগে কোরব পক্ষন্ত ছর্যোধন বারো পাণ্ডব পক্ষন্ত পুরি
অর্জুন দ্বারকায় শ্রীকৃষ্ণাং সালৈলা । উদ্দেশ্যহান অইলতাই
শ্রীকৃষ্ণাং সাহায্য প্রার্থনা ।

অন্তঃরামী শ্রীকৃষ্ণ হাবিতা হারপারগো । তা ঘুমজানির
সটন দিয়া ফামহানাং ঘুমজিয়া থাইল । হিয়র বারাদে হবা
ছনার সিংহাসন আহান থ'দিল । শ্রীকৃষ্ণই মনে মনে হারপার
যে অভিমানী ছর্যোধন যেসাদেউ আয়া ছনার সিংহাসনহানাং
বহিতৈ ।

ছর্যোধন বারো অর্জুন আকসাটে ঘরে হমেইলাগা ।
ছর্যোধনর আহিগীং পয়লাই সিংহাসনহান পড়িল । তা ডিল
নাকরিয়া বহিলগা । এবেদে অর্জুন বারো বহানির কোন ফাম
নাপেইলো । তা শ্রীকৃষ্ণরে মারুপগো নিংকরের বারো নিয়াম
নিজরগো বুলিয়া বিশ্বাস করের । উহানেতে কোন আহান শঙ্কা
নাকরিয়া তার জাঙবারাদে ফামহানর কাদা আগং বহিলগা ।
শ্রীকৃষ্ণ ঘুমেত্ত উঠিয়াউ আহিগী মেলিয়া পয়লাই অর্জুনরে দেখলো ।
থাংনাং দেখলোতাই হিয়র বারার সিংহাসনহানাং বয়া আছে
ছর্যোধনরে ।

দ্বিয পক্ষর আহানির উদ্দেশ্যহান ছনিয়া শ্রীকৃষ্ণই মাংলো—
মি আকবেদে বারো আরবারাদে হাজার আহান নারায়নী সৈন্ত
—তানু হাবিগীউ মহা যুদ্ধা বারো পাংকালপা । তুমি যেহান

মনারাই উহান নেনা পাররাই । কিন্তুমান হাবিত্ত ডাঙর কথাহান
অইলতাই লালফামে মি অস্ত্র নাধরতৌ । তবে কথা আহান
অইলতাই, পয়লাই মি অর্জুনরে দেহেছিলুগো—উহানেতে পয়লাই
অর্জুনে মাতক্ তা কিহান চারতা ।

হারৌ অয়া অর্জুনে মাংল—হে কৃষ্ণ, মি তোরেই চাউরি ।
দুর্যোধন মনে মনে হারৌ অইল—কিয়া বুঝে, অস্ত্র নাধরতৌ
শ্রীকৃষ্ণরে নিয়া কিহানৌ বা লাভ থাইতৈ ? উহানেতে নারায়নী
সৈন্তই দলা'গ লাভ অইতৈ । এতা খালকরিয়া দুর্যোধন হাংকৈ
নায়া নারায়নী সৈন্ত তেংকলহান চেইলো । শ্রীকৃষ্ণই যেহান
নিংকরেছিল উহানে ফলিল । তা মনে মনে মুগ্ধি দিল । তা
যুদ্ধরমা পাণ্ডবর পক্ষ লয়া অর্জুনর সারথীগো অইল । লালফা-
মরমা যোগোর সারথীগো স্বয়ং ভগবান ঈশ্বর তারাং আর খাল-
করিলতা বা কিতাউ আছে !

অর্জুন উবাকা পেয়া শ্রীকৃষ্ণরে ভগবানর অবতার বুলিয়া
নানিংকরেছিল । শ্রীকৃষ্ণরে অন্তরগো যৌঅয়া বানা পেইলেউ
তারে মারূপ হিসাবে চিনেছিল । তা নিংকরেছিলতাই—
শ্রীকৃষ্ণ জ্ঞানী, বীর বারো তানুর হিতাকাঙ্খীগো । তা ছাড়া
তানুরতা আর কুংগৌ নেই । উহানে শ্রীকৃষ্ণর উপদেশ ইলয়া
চলতারা—শ্রীকৃষ্ণই তানুর আক্হান আদর্শ ।

কুরুক্ষেত্রর লালফাম এহান নানারকা শ্রীকৃষ্ণই দলা'গ হুয়া
করলো । কিন্তুমান, দুর্যোধনর একবাম অয়া যুদ্ধে থেংনা অনির
বাসনাহানে হাবি শাস্তির আলোচনা নিঃফল অগেলগা । যুদ্ধ
ষেসাদেউ অনাৎ পড়িল । ঐ হাকতাকর যুদ্ধর নিয়ম ইলয়া,

দ্বিয় পক্ষর মতলো যুদ্ধর কাম, সময়, দিন আদি ঠিকঠাক করিয়া কুরুক্ষেত্রত দ্বির পক্ষ যুদ্ধরকা মুণ্ডামুণ্ডি অইল। দ্বিয় পক্ষর সেনাপতিয়ে নিজর নিজর পক্ষর সৈন্যরে যুদ্ধরকা হাজানি লাগল।

আর বারাদে রাজা ধৃতরাষ্ট্র জিপুতর মায়ায় যুদ্ধর ঘটনা বারো ফলাফল হারপানিরকা নিয়াম উতলা অইল। ব্যাসদেব উহানেতে সঞ্জয়রে যুদ্ধর হাবিতা বিবরণ ধৃতরাষ্ট্ররাং বর্ণনা করানির ভারহান দিল। যুদ্ধর ঘটনা হাবি সঞ্জয়ে ধৃতরাষ্ট্ররাং মাতানি অকরলো। গীতা এহান এহানাত্ত আরম্ভ অইল।

কুরুক্ষেত্রর যুদ্ধ আরম্ভ অনা বাকী নেই। দ্বিয় পক্ষরতাউ থেংনা অনা বাছেয়া আছি। এসাদে মহাযুদ্ধ ভারতর ইতিহাসে নেই। পাণ্ডবর প্রধান সেনাপতি অর্জুন তার সারথী শ্রীকৃষ্ণরে মাতের, দয়া করিয়া রথহান আকপেইং উবা কর—এসাদে কামে উবা কর-যেপেইং থায়া বিপক্ষ দলর রথী হাবিরে দেহে পারৌরি। শ্রীকৃষ্ণ তার কথা মত রথহান উবা করল।

অর্জুন রথহানাং থায়া হাবিরে হবা করে চেয়লো। চেয়তে চেয়তে খাংখা তার মনহানাং দুর্বলভাব আহান আহিল। যেতার বিরুদ্ধে যুদ্ধ করতৈ উতাহাবি তার জ্ঞাতি বারো সাকেই! যুদ্ধ এহানাং জিঙানি মানে—তাহুরে বধ করানি—উহান অইলেতে এ জিঙানি এহানর লাভহানতে কীহান? এতা কিতা নানান চিন্তাত তার চিন্তগো বিভ্রম অইল। শ্রীকৃষ্ণরে ডাহিয়া মাংলো—হে সখা, মোরে ক্ষমা কর, মি অস্ত্র ত্যগ করলু,

এ যুদ্ধ এহান মি করে নারতো । মোর সাকেই, জ্ঞাতি হাবিরে
মারিয়া রাজ্য ভোগর বাসনা মোরাং নেই ।

আর নিয়াম সময় নেই যুদ্ধহান আরম্ভ অইতৈ । এমন
তাজাগং অর্জুনর মনহান বাগিল যেহান কল্লনার অতীত আছিল ।
শ্রীকৃষ্ণ মহা ফাপরে পড়িল । উপেইং অর্জুনরে বারো মনহান দরা
করিয়া লালফামে উবা করানিরকা বুজানি অকরলো । শ্রীকৃষ্ণই
অর্জুনরে বুজার জীবন এহান কিহান, মরণএহান কিহান, কুংহান
কর্তব্য, কুংহান অকর্তব্য, ধর্ম কুংহান, এতা কিতা তত্ত্ব ।

শ্রীকৃষ্ণর এরে উপদেশ এতাই গীতা অয়া সাতয়া নিকুলিল—

দ্বিতীয় অধ্যায়

সাংখ্য ভোগ

অর্জুনে আহিরপানি বেলা বেলা যুদ্ধ করতুনা নাকরতু উহান
খালকরিয়া আছে তাঞ্জা উগং শ্রীভগবানে বুজানি অকরল'— ॥ ১ ॥

শ্রীভগবানে মাতের—হে অর্জুন ! এ তাঞ্জিকাম যৌঅছে কাল
এহানাং অনার্য্যভাব, স্বর্গহানিকর, অকীর্তিকর তোর এসাদে মোহ
এহান কোরাংত ফৌঅইলগাতা ? ॥ ২ ॥

হে পার্থ, তাপিত্ব নাকরি, এসাদে মুনিথকপা নেয়নি এহান তোরাং
চুনা না'র । হে পরম্প, কিন্তাউনেই হৃদিএগর হাংকৈহান বেলেয়া
যুদ্ধং উবাঅ' ॥ ৩ ॥

অর্জুনে মাতের—হে শত্রু মর্দিন মধুসুদন, মি লালফামে মোর
পূজনীয় ভীষ্ম বারো দ্রোণর লগে কিসাদে কারলো যুদ্ধ করতোতা ?
তানু মোরাং কার এরেদেকা কিন্তুমান গুরুজনর অঙ্গগোং মি
অস্ত্র নাকাপকরতো ॥ ৪ ॥

এ মহানুভব গুরুজনরে নামারিয়া ইহলোকে ভিন্কা করিয়া ঠৈ
জিংতা করলেউ দলা'গ উত্তম । কিয়া বুলে, গুরুজন মারিয়া
ইহলোকে যেতা অর্থকাম ভোগ করতো উতাতে রকতলো
তিড়াছিতা ॥ ৫ ॥

আমি জিউকি অথবা তানু আমারে জিউকা এদ্বিয়হানিরমা কুংতার
চুম মি ভৌ নাপাউরি—যেতারে মারিয়া জিংতাঅয়া থানা
নামনাউরি, ও ধৃতরাষ্ট্রর জিপুত মোর মুণ্ডে উবা অয়া আছি ।
এহানাং জয় বারো পরাজয় কুংহান যে সঠিকহান, এহানাং
মি সন্দে করিয়া আছ ॥ ৬ ॥

চিন্তাএগোর থিং নেয়নিযে মি উপআপ নারৌরি ; হুতোমে ধর্মহান
কিহান লেপকরে নারৌরি ; যেহান হবা অর উহান মোরে চুমকরিয়া
ইলকরেদে, মি তোর শিষ্যগো, তোরাং আশ্রিতগো মোরে
উপদেশ দে ॥ ৭ ॥

পৃথিবীরমা কাটা নেইপা ভৈববশালী রাজ্য বারো ইন্দ্রলোকর
রাজত্ব পেইলেউ ; যে তাপিহই মোর ইন্দ্রি হাবিরে ডহা ডহা
থইতৈ উহান কিসাদে যিতৈগাতা—মি ভৌ নাপাউরি এতা বুলিয়া
অজ্জুন—“মি আর যুদ্ধ নাকরতৌ” বুলিয়া তুমিল অয়া থাইল ।

॥ ৪-৯ ॥

শ্রীভগবানে মাতের—যেতারকা তি ছুঃখ করর উতার কোন কারণ
নেই ; তি তানুরকা ছুঃখ করর বারো পণ্ডিতগোর সাদে মাতে
যারগা । কিন্তুমান হুতোমে তত্ত্বজ্ঞানী উতাই জিংতা অনি বা
মরানি এতালো ছুঃখ নকরতারা ॥ ১১ ॥

হে পুরুষ শ্রেষ্ঠ, স্থির বুদ্ধির মানু উগৈ সুখ-ছুখ এতারে মান্নাকরে
গ্রহন করের ; উহানাং অস্থির নাইতারা ; তা অমৃতস্বরূপ মোক্ষ
লাভ (মরণ জয় করে পারের) করানিং সমর্থ অর ॥ ১৫ ॥

দেহএগো নাথারগো । কিন্তুমান, আত্মাএগো উমরকারগো, বিনাশ
নার বারো স্বপ্রকাশ, হানতে, হে অজ্জুন, যুদ্ধকর—স্বধর্ম পালন
কর ॥ ১৮ ॥

যেগৈ আত্মাএগোরে মারেপারের বা যেগৈ মরের বুলিয়া নিংকরের
উতায় আত্মতত্ত্ব হারনাপেইতারা । তা মারেউ নারের বারো মরনৌ
নেই ॥ ১৯ ॥

এ আত্মাএগো কোনদিন জরম নার বারো মরনৌ নার । তা আরার
বস্তুর সাদে জরম অয়া অস্তিত্ব লাভ নাকরের । তা উমরহান
পালয়া ধার । তারায় জরম নেই, নিতা, শাশ্বত বারো পুরাণা
দেহগো মরে গেলগাউ তাতে নামরেরতাছে ॥ ২০ ॥

অস্ত্র হাবিয়ে তারে ছেদা নারের, জ্বিগৈ পুড়ে নারের, পানিয়ে ভিঙা
নারের বারো বৌহানে ছকা নারের ॥ ২৩ ॥

দেহগো নাশঅনার লগে আত্মাগো নাশঅর স্বীকার করলেউ দুঃখ
করানি থক নেই । কিয়া বুঝে, জরম মরণ এহান অবশ্যস্তাবী ॥ ২৬ ॥
জরম অইলেই মরণ এহান যেসাদেউ অরহান, যেগো মরের তার
জরমঅনা যেসাদেউ শৈনেই । উহানেতে যেসাদেউ অয়তৈ বিষয়
উহানলো দুঃখ করানি থক নেই ॥ ২৭ ॥

হে ভারত, জীবহাবির দেহগোং আত্মা বিচুমান বারো অবধা,
উহানেতে কোন প্রাণী আগরকাউ দুঃখ করানি থক নেই ॥ ৩০ ॥
হে পার্থ, এ যুদ্ধ নিজেস্ত আছেছেহান ; এহান আওছে স্বর্গর
দোয়ারহানর সাদে । কপালহবা ক্ষত্রিয়উতাই এসাদে লালফামর
সেপ পেয়ভারাতা ॥ ৩২ ॥

যুদ্ধং মরলে স্বর্গলাভ ; জিংলে পৃথিবী ভোগ করে পারতেই,
উহানলো হে কৌন্তেয়, একবাম অয়া যুদ্ধরকা উবাঅ' ॥ ৩৭ ॥
হানতে, হীন-দুঃখ পানা-নাপানি, জয়-পরাজয় মান্নাজ্ঞান করিয়া
যুদ্ধং খেঙনিরকা যুগংঅ' । এসাদে করলে পাপরভাগী নাই-
তেই ॥ ৩৮ ॥

কর্মই তোর অধিকার, কর্মফলে তোর কোন অধিকার নেই।
কর্মফল এহান তোর কর্মর বৃত্তিহান যেন নার, বারো কর্ম
ত্যাগ করানির প্রবৃত্তি এহানো তোরাং যেন নাথার ॥ ৪৭ ॥

হে ধনঞ্জয়, ফল পানার আশাহান ত্যাগ করিয়া, সিদ্ধ বারো
অসিদ্ধরে মান্নাজ্ঞান করিয়া তি কর্ম কর। হাবি কাহামে মন-
হানরে এসাদে থপারলে যোগ বুলতারা ॥ ৪৮ ॥

হে পার্থ, যেবাকা কোনআগৈ তার হাবি মনর কামনা বর্জন
করিয়া নিজর ভিতরে নিজে তুষ্ট অয়া থাপারের—উপেইং তা
স্থিতপ্রজ্ঞ বুলিয়া পরিচয় অর ॥ ৫৫ ॥

যেগো ছুঃখরমা উতলানার, নুঙেইহানাং হারৌনার, যেগর অনুরাগ
ডর বারো শৌঅনি তুমিল আছে, তারেই স্থিতপ্রজ্ঞ মুনি বুল-
তারা ॥ ৫৬ ॥

যেগো হাবিতা কামনা ত্যাগ করিয়া আকাঙ্ক্ষাহীন অয়া পালয়া
থাপারের, যেগো মায়া মমতা শূন্য বারো অহঙ্কার শূন্য তা শান্তি
পেয়া যারগা ॥ ৭১ ॥

তৃতীয় অধ্যায়

কৰ্মযোগ

অৰ্জুনে মাতেৰ—হে কেশব, যদিশৈ কৰ্মতপুৰি জ্ঞানে শ্ৰেষ্ঠ
অৰ বুলিয়া নিংকরর, উহান অইলেতে কিতারকা মোরে হিংসার
কৰ্ম করানিরকা থোতাল দিয়রতা ? ॥ ১ ॥

আকবেদে কৰ্মর আরবারাদে জ্ঞানর প্রশংসা করিয়া মোরাং
সন্দে বরাদিলে—বুদ্ধিরভ্রম ঘটা দিলে । উহানেতে দ্বিয়হানিত্ত
কুংহানে উত্তম, উহানি ঠিক করিয়া মোরে মাতেদে মি যেন
ও পথ ইলয়া চলে পারোরি ॥ ২ ॥

শ্রীভগবানে মাতেৰ—হে অৰ্জুন, মি আগে মাতেছিলু—কৰ্ম
বা মোক্ষর হু'গো পথ আছে—জ্ঞানীরাং জ্ঞানযোগ বারো কৰ্মীরাং
কৰ্মযোগ ॥ ৩ ॥

কৰ্ম না করিয়া কোন আগো কৰ্মত পুরি খেয়' নারতারা । হৃদা
কৰ্মত্যাগ করলেই সিদ্ধিলাভ করে নারতারা ॥ ৪ ॥

কৰ্ম নাকরিয়া কোন আগো মেত্তম আহান থা'না নারতারা ।
বানা-মুংশি বা বিদ্বেষ মানুর প্রকৃতিগত ধৰ্ম্ম । এতাই ইল-
করিয়া মানু এতারে কাম করানিং হেইনা করেৱ ॥ ৫ ॥

যেগৈ কৰ্মর ইল্লি হাবি (আত, জাঙ, থতা এতা কিতা)
দোয়াদে তুমিল করিয়া মনে মনে নানান ভোগ্য বস্তুর কথা
খালকরেৱ—ও পাপিষ্ঠ উগরে ভণ্ড বুলিয়া মাতারা ॥ ৬ ॥

হে অর্জুন, যেগৈ মনহানরে একবাম করিয়া ইন্দ্ৰি হাবিরে বশ
করিয়া মনহানাং কোন আসক্তি নাথয়া আত, জাও এতা কিতা
কশ্মেন্দ্ৰিয়লো কাম করে যারগা—তাই শ্রেষ্ঠগো ॥ ৭ ॥

হে অর্জুন, ঈশ্বরর তুষ্টিরকা যেতা কশ্ম যজ্ঞ অ'র—উতাছাড়া
অন্য কশ্মযজ্ঞয় মানুরে সংসার হানাং কলকরিয়া থ'র। উহানলো
নিকাম ভাবহানলো হুদা ঈশ্বররকা কশ্ম কর ॥ ৯ ॥

ব্রহ্মাই সৃষ্টির আগেই পয়লাই মানুরে সৃষ্টি করে। উতার থাংনাং
যজ্ঞ (নিতিকার ক্রিয়া) সৃষ্টি করিয়া মাংলো এরে যজ্ঞএতা
করে করে দিনে দিনে তোমার উন্নতি অ'ক। এ যজ্ঞই তোমার
হাবি ধৌরাং পুরা দিতৈ ॥ ১০ ॥

এরে যজ্ঞএতা করিয়া তুমি দ্যৌরে হারৌ কর ; বারৌ তৌ ঐ
তোমারে হারৌ করকা। এসাদে করে আগরে আগর উপকার
করলে দ্বিয় বারারতাউ মঙ্গল অ'র ॥ ১১ ॥

যজ্ঞ (বেদপাঠ ব্রহ্মযজ্ঞ, তর্পনাদি পিতৃযজ্ঞ, হোম-দেবযজ্ঞ, অতিথি
সেবা মনুষ্য-যজ্ঞ) করলে তৌ হাবি হারৌ অইলে তুমি যেতা
চেইতারাই উতাই পেইতারাই। তানুরে দেছি বস্তু উতা তানুরাং
নিবেদন নাকরিয়া যেগৈ নিজে ভোগ করের—তা চোরগো ॥ ১২ ॥

যেতাই যজ্ঞ করিয়া তানুর লেমকরা (অর্থাৎ তৌরাং নিবেদিত
প্রসাদ) ভোজন করতারা তানু হাবি পাপেত্ত মুক্ত অইতারা।
কিন্তুমান, যেতাই হুদা নিজরকা কুলিয়া ভোজন করতারা ঐ
পাপী উতা হুদা পাপহে ভোগ করতারা ॥ ১৩ ॥

জীবএতা অন্নগন্ত জরম অইতারা—বরণেত্ত পুরি অন্ন (শস্য)
জরম অর, যজ্ঞত্ত পুরি বরণ বারো হোম এতাকিতা বৈদিক
কর্মত্তপুরি যজ্ঞ অ'র ॥ ১৪ ॥

বেদরাংত কর্মর জরম (বেদরমা কর্মর লেইত্রো আছে) বেদ
পরব্রহ্মত্তপুরি নিকুলেছে—এহান হারপেইছ। উহানলো যে ব্রহ্ম
জগৎহান হাবি হাপদিয়া আছে—তা হাবি সমৈত যজ্ঞত বর্তমান
আছে এহান নিংকরিছ ॥ ১৫ ॥

হে অর্জুন, এ সংসার এহানাং যোগে এরে কর্মর লেইত্রো ইলয়া
না চলের, ছদ্মা ইন্দ্রি সেবালো বুরদিয়া থার মানু উগর জনম-
হানরগায় বৃথা ॥ ১৬ ॥

কিন্তুমান, যোগো ছদ্মা আত্মাগরমাই হারো অ'র, তৃপ্তিপার
বারো তুষ্ট থা'র—তারতা কোন আহান করানির প্রয়োজন
নাথা'র ॥ ১৭ ॥

এ জগতে তা'রতা কোন কর্ম করানির দরকার নাপরের। কর্ম
নাকরলেউ তা'রে পাপে নাপার। বারো প্রয়োজন মিটানিরকা
অন্য প্রাণীর আশ্রয়ে যানাউ নালাগের ॥ ১৮ ॥

উহানলো ফলরমা আশা নাথ'য়া হাবি সমৈত কর্ম করিয়া যাগা
কিয়া বুলে, ফলর আশা এরে দিলে মানু মুক্তি পাযিতারাগা ॥ ১৯ ॥
শ্রেষ্ঠ মানুহে যেতা যেতা করতারা, আরার সাধারণ মানুহে
ও কর্ম ইলয়া করতারা। শ্রেষ্ঠ মানু উগৈ যে কর্মহান ছত্তো-
মেহান বুলিয়া স্থির করের—অন্য মানুহে উহানেই য়াকরিয়া
চলতারা ॥ ২১ ॥

হে অর্জুন, মোরতা করিলতা কিস্তাউ নেই। কিয়া বুলে, মোরতা
এ ত্রিভুবন এগং নাপানিরতা কিস্তাউ নেই। তেবৌ মি কশ্ম
করৌরিতাহে ॥ ২২ ॥

হে অর্জুন, মি আটেলএহান উরা বেলিয়া কশ্ম করৌরি। যদিশৈ
এতা নাকরলুঅইছ, উহান অইলে মোর দেহা দেহি আরারতাইয়ৌ
মোরতা ইলয়া চল্লা অইছ ॥ ২৩ ॥

মি যদিশৈ কশ্ম নাকরৌরি, উহান অইলে হাবিতা উচ্ছন্ন অয়া
যিতৈগা। মোর দোষেই বর্গশঙ্কর নিকুল্লাঅইছ বারো হাবি লোক
মোর দোষেই ধ্বংস অয়তৈ ॥ ২৪ ॥

হে অর্জুন, অজ্ঞান মানু এতাই কশ্মরমা আসক্তি থ'য়া যেসাদে
কশ্মরমা লিপ্ত অইতারা, জ্ঞানী-মানুৱে কশ্মরমা আশক্তি নাথ'য়া
লোক শিক্ষারকা উসাদে কশ্মকরিয়া থাইতারা ॥ ২৫ ॥

হে মহাবীর, আত্মা এগৌ গুণ বারো কশ্মন্ত পুরি খেই বস্তুহান।
এ সেতাএহান যেগৈ হারপার—তাই উপ'পারের যে ইন্দ্রি এতাই
কশ্ম এতা করেৱতা, আত্মাগৈ নাগৈ। এহান হারপেয়া জ্ঞানী
মানুৱে 'মি করৌরি' বুলিয়া নিং নাকরতারা ॥ ২৬ ॥

হাবি কশ্মর ফল মোরাং কাংকরিয়া (ফলর কামনা না করিয়া)
ভগবানরাং মনহান অর্পন করিয়া 'মোরতা' বুলি লভাব এহান
নেইকরিয়া দুঃখ ত্যাগ করিয়া যুদ্ধ কর ॥ ৩০ ॥

যে যে মানু মোর কথা এতা ঠাচা করিয়া—এতারমা কোন
দোষ নাধরিয়া হাবি সন্মৈত মোর এরে কথা এতা ইলয়া চলতারা,
তানু কশ্ম করে গেলেগাউ কশ্মর বাধহানাং আটক নাইতারা ॥ ৩১ ॥

কিন্তুমান যেতাই মোর মত এহানর নিন্দা করতারা বারো মতহান
ইলয়া নাচলতারা, ঔ বিবেক-লৌশিং নেই মানু উতার কোন
জ্ঞান নেই। তামুরতা কোন আহানো হবা না'র এহান হার
পেইছ ॥ ৩২ ॥

হাবি ইঞ্জিয়র স্বভাবহান এহান—মনে য়াকরের বিষয়হান অইলে
হবা লাগতৈ বারো মনে নাকরলে হবা নালাগতৈ। এরে হবা
পানা নাপানি—দ্বিয়হানিয়ৌ মুক্তির পথগৎ বাধা স্বরূপ। উহা-
নেতে কোনহানরৌ বশে থা'না থ'ক নেই ॥ ৩৪ ॥

নিজর ধর্ম এহানাৎ দোষভুল থাইলেউ উহানাৎ মরেগেলেগাউ
শ্রেয়। কিন্তুমান পরর ধর্মৎ হবা থাইলেউ উহান নিয়াম
ভয়ঙ্কর ॥ ৩৫ ॥

অর্জুনে আংকরের—হে কৃষ্ণ ! মানু এতাই পাপ করানি নামনেই-
লেউ, জোর করিয়া মানুএতারে পাপএতা কুংগৈ করবারতা ? ॥ ৩৬ ॥
শ্রীভগবানে মাতেব—এহান অইলতাই কাম (কাম এহান বাধা
পেইলে শৌঅনি উৎপন্ন অর) এতা রাজোগুণেন্দুপুরি উৎপন্ন
অরতা। এহানরে কোনতাই তুষ্ট করে নারের, এহানর পাংকাল
জবর বারো ডরেইল মাচাক। উহানলো এতারে শত্রু বুলিয়া
নিংকরিছ ॥ ৩৭ ॥

হে অর্জুন, এরে কাম এহান মানুর উমরকার শত্রু—এগরে
কোনতাই তুষ্ট করিয়া থ' নারের ; এগই জিগর সাদে তপ্তা করের,
এগই জ্ঞানরে চাপা দিয়া থ'র ॥ ৩৯ ॥

ইন্দ্রি, মন বারো বুদ্ধি—এ তিনহানিং কাম আশ্রয় করিয়া
থা'র। কাম এতাহাবিরেলো (ইন্দ্রি, মন বারো বুদ্ধি) মোহ
করিয়া থ'দের ॥ ৪০ ॥

হে অর্জুন, উহানলোতি পয়লাই ইন্দ্রি হাবিরে দমন করিয়া
এরে কাম বুলতারা তুষ্ট এগরে নাশ কর; কিয়া বুল্লে এরে
কাম এগই মানুর জ্ঞান-বিজ্ঞান নাশ করে দে'র ॥ ৪১ ॥

দেহএগন্ত ইন্দ্রি এগো ডাঙর; ইন্দ্রিগন্ত ডাঙর মনহান, বারো
মনহানান্ত বুদ্ধি এহান ডাঙর। যেগো বুদ্ধিরাংতো ডাঙর, উগৈ
আত্মা ॥ ৪২ ॥

হে অর্জুন, আত্মাএগো বুদ্ধিরাংতো ডাঙর। এ কথা এহান
হারপেয়া বুদ্ধিলো মনহানরে তুমিল করিয়া এরে ভয়ঙ্কর শত্রু
কামরে ধ্বংস কর ॥ ৪৩ ॥

চতুর্থ অধ্যায়

জ্ঞান যোগ

শ্রীভগবানে মাতের—এরে অব্যয় যোগ এহান মি সূর্যদেবরে
মাতেছিলুহান। সূর্য্য (পুতক) মনুরে, থাংনাং মনু (পুতক)
ইক্ষাকুরে মাতেছিল ॥ ১ ॥

এসাদে করে বংশ পরামপর ইলয়া এ যোগ এহান রাজর্ষি
হাবিরাং ফৌঅছিল। হে বীর, ইহলোকে ঐ যোগ উহান দলা'গ
দিনর সালে মুতয়া গেলগা ॥ ২ ॥

তি মোর কুংশিপা ভক্ত বারো মারুপগো, উহানলো ঐ পুরানা
যোগউহান এবাকা তোরাং মাতৌরিতা; কিয়াবুলে এহান উত্তম
আচেংপা তহুহান ॥ ৩ ॥

অর্জুনে আংকরের—হে ঈশ্বর, তো'র জন্ম পিছে, সূর্য'র জন্ম
আগে; হানতে, আগেদে যে মাতেছিলে উহান কিসাদে হার-
পেইতো? ॥ ৪ ॥

শ্রীভগবানে মাতের—হে অর্জুন, মোর বারো তো'র দলা'গ জনম
আগেদে অগেছেগা। মি উতা হারপাউরি, কিন্তুমান হে পরম্প
তিতে হারনাপেইতেই ॥ ৫ ॥

মোর জন্মো নেই মরনোনেই, মি উমর পালপাগো বারো হাবি
জীবর ঈশ্বর অয়াউ নিজর প্রকৃতিরমা অধিষ্ঠান করিয়া আত্ম
মায়ালো মি আবির্ভাব অউরি ॥ ৬ ॥

হে ভারত, যেবা'কা যেবা'কা ধর্ম'র গ্লানি বারো অধর্ম'র অভ্যা-
খান অর, মি ঐ তাজাং (দেহগো ধরিয়া) অবতার অউরি ॥ ৭ ॥

সাধুহাবিরে পরিত্রান, দুষ্টহাবির বিনাশ বারো ধর্মের সংস্থাপনর
সালেদে যুগে যুগে অবতীর্ণ অউরি ॥ ৮ ॥

হে অর্জুন, মোর এ অলৌকিক জরমঅনা বারো কর্ম যেগৈ
তবুলো হারপাপারের, তা দেহত্যাগ করিয়া আলখক আর জরম
নার—তা মোরে পায়ারগা ॥ ৯ ॥

বিষয়আশয়ে অনুরাগ নেই, ডর বারো শৌঅনি বেলা পারিয়া
একচিত্ত অয়া মোর শরণ লয়া, জ্ঞানর তপস্থাল পবিত্র অয়া
অলেখমানু মোরে পাগেছিগা ॥ ১০ ॥

যেগোর কর্মর প্রচেষ্টা, ফলর আশা বারো কামহানর সালে
অহংভাব নেইকরে পারেছে, তারাং কামর জ্ঞান রূপী জ্বিগৈ ডহাছে
ভাব থা'য়ারগা ; ঔ সাদে জন উগোরে জ্ঞানীয়ে পণ্ডিত বুলিয়া
মাতারা ॥ ১১ ॥

কোন কোনগৈ দ্রব্যদান রূপ যজ্ঞ, কোনগৈ তপরূপ যজ্ঞ, কোনগৈ
যোগরূপ যজ্ঞ, কোনগৈ বেদভ্যাসরূপ যজ্ঞ বারো কোনগৈ
বেদজ্ঞান যজ্ঞর অনুষ্ঠান করতারা ॥ ১৮ ॥

শ্লোক এহানাং পাচ রকমর যজ্ঞর কথা মাতেছে—

- (১) দ্রব্যযজ্ঞ — জিনিষ ত্যাগ রূপ যজ্ঞ ।
- (২) তপোযজ্ঞ — কঠিন চান্দ্রায়ণাদি ব্রতঃ উপবাস ।
- (৩) যোগযজ্ঞ — চিত্তগো তুমিল করিল যোগ, এহানে অষ্টাঙ্গ
যোগ বা রাজযোগ ।
- (৪) স্বাধ্যায় যজ্ঞ — ব্রহ্মচর্য্য অবলম্বন করিয়া যথাবিধি বেদর
অভ্যাস ।

(৫) বেদজ্ঞান যজ্ঞ — মুক্তিলো বেদর অর্থ নির্ণয় করানির নাং
বেদজ্ঞান যজ্ঞ ।

এরে যজ্ঞ করতারা জনউতা হাবিয়ৌ পাপেত উদ্ধার পেইতারা ।
যেতাই অমৃত স্বরূপ যজ্ঞর অন্ন ভোজন করতারা তানু সনাতন
ব্রহ্মপদ পায়িতারাগা । কিন্তুমান হে কুরুশ্রেষ্ঠ, যেগৈ কোন
রূপ যজ্ঞ নাকরতারা, তানুর ইহলোকৌ নেই বারো পরলোকৌ
নেই ॥ ৩০-৩১ ॥

হে পরম্প, দ্রব্যসাধ্য দৈবযজ্ঞতপুর্নি জ্ঞানযজ্ঞ দলা'গ গজে, কিয়া
বুল্লে, ফলেত্ত অকরিয়া হাবি কশ্ম জ্ঞানরমা লয়য়ারগা ॥ ৩৩ ॥
জ্ঞানী তত্ত্বদর্শী গুরুরে হমাদিয়া, নানানতা প্রশ্ন আংকরিয়া, সেবা
করিয়া জ্ঞান উপদেশ লনারকা হন্না করিছ ॥ ৩৪ ॥

তি যদি হাবি পাপেতপুর্নি আরাকৌ পাপাচারী অ'র, তেব
জ্ঞানরূপ নৌগলৌ হাবি পাপস্ময়ুজ্জ লালোযিতেইগা ॥ ৩৬ ॥
হে অর্জুন, যেসাদে জ্বলিয়া থার জ্বিগৈ রুকহাবিরে শালিগৌ
করে বেলার, উসাদে জ্ঞানরূপী জ্বিগৈ কশ্মহাবিরে ভস্ম করে
দের ॥ ৩৭ ॥

ইহলোকে জ্ঞানর সাদে মান্না পবিত্র কিত্তাউ নেই । কশ্মযোগে
সিদ্ধপালপা জন উগৈ ও জ্ঞান নিজর ভিতরে নিজেই পা'
পারের ॥ ৩৮ ॥

যেগৌ গুরুদেবর প্রতি শ্রদ্ধাবান, একনিষ্ঠ সাধনে তৎপর বারো
জিতেদ্রিয়, তা জ্ঞান লাভ করে পারের আত্মজ্ঞান করিয়া হরাঅয়া
শান্তিলাভ করে ॥ ৩৯ ॥

জ্ঞানহীন, শ্রদ্ধাহীন বারো সন্দেশে থাকুরা মান্ন বিনষ্ট আইতারা ।
উতরতা ইহলোকৌ নেই, পরলোকৌ নেই বারো হারৌপাউ
নেই ॥ ৪০ ॥

পঞ্চম অধ্যায় কর্ম সন্ন্যাস যোগ

অর্জুনে আংকরের — হে কৃষ্ণ, তি আকবেদে কর্মত্যাগ করানি-
রকা বুলর, আরাক আকবেদে কর্মযোগ থ'ক বুলিয়া মাতর ।
এবাকা এদ্বিয়হানিরমা কুংহান মোরাং হবা অইতৈ উহান সঠিক
করে মাতেদে ॥ ১ ॥

শ্রীকৃষ্ণই জোরাবদে'র — কর্মত্যাগ বারো কর্মযোগ (নিষ্কাম
কর্ম) এদ্বিয়হানির্যো মুক্তির পথগো ইলকরিয়া দে'র । কিন্তুমান
উতারমা বারো কর্মযোগ এহানে হবাতাহে ॥ ২ ॥

যেগরতা কোনগর গজে হিংসা—নিন্দা নেই বা কোন আক্রাণ
গজে আসক্তি নেই, য়েগৈ হারো, ছখ এভাব দ্বিয়হান খেই
নাকরিয়া থা'পারের, হে, মহাবীর উগো নিত্য সন্নাসীগো,
তা ইলেইলেইকরে সংসারর বাধন এহানাত্ত মুক্তি অ'র ॥ ৩ ॥

যেতাই কোন আক্রাউ ভৌনাপেইতারা, উতাই জ্ঞান যোগ বারো
কর্মযোগরে খেই বুলিয়া লেপকরতারা, কিন্তুমান পণ্ডিতউতাই
উহান নামহারা । এদ্বিয়হানিরমা যেকোন আহানরে হবাকরে
ধরলে দ্বিয়হানিরো ফল পাযিতারাগা ॥ ৪ ॥

জ্ঞানীয়ে জ্ঞানর পথপো ইলয়া যে কামে ফৌঅনি পারতারা,
কর্মযোগীউ কর্মর পথগো ইলয়া ঔফামে ফৌঅনি পারতারাগা ।
উহানেতে জ্ঞানযোগ বারো কর্মযোগ দ্বিয়হানিরে আক্হান বুলিয়া
নিংকরের উগৈ ছভোমকার জ্ঞানীগো ॥ ৫ ॥

ধামপালর পাতাহানাৎ যেসাদে পানি নালাগের, উাসাদে যেগৈ
হাবিতা কৰ্ম্মফল ঈশ্বরর নিঙে কাংকরিয়া, মনহানাৎ কোন
আসক্তি নাথ'য়া কৰ্ম্ম করে, তা পাপরমা তিলয়া নাথার ॥ ১০ ॥

যোগী আসক্তি এরাদিয়া, ছদ্দা নিজরে সেংকরিয়া থ'নার সালেদে
গারিগো, মনহান লৌশিং বারো ইন্দ্রিহাবিলো কৰ্ম্ম করে —
ঔ ইন্দ্রিউতারমা নিজর বুলিলতা ভাব নাথ'র (ঈশ্বরর হারৌর
সালেদে তা কৰ্ম্মকরের) ॥ ১১ ॥

যেগো ঈশ্বরর নিঙে কৰ্ম্মকরের, তা কৰ্ম্মর ফল এতারমা উদাসীন
থাপারানির সালে পরম শান্তি (মুক্তি) পা'পারের । বারো যেগৈ
নিজর নিঙে কামনা থ'য়া কৰ্ম্মকরের, তা কৰ্ম্মর বাধহানরমা
আটকঅয়া থ'র ॥ ১২ ॥

যেগৈ ইন্দ্রি জয় করে পারেছে, তা মনে মনে হাবি কৰ্ম্মত্যাগ
করিয়া নয়হান ছুরারর দেহএগোরমা নিয়াম হারৌ অয়া থ'র,
তা কৰ্ম্ম করে গেলেগাউ হুন্তোমেতে তা কোন কৰ্ম্ম নাউকরের,
নাউ করুবার ॥ ১৩ ॥

ভগবান জীবরকা বুলিয়া কৰ্ত্ত্ব, কৰ্ম্ম বা কৰ্ম্মফল আকৃতাউ
সৃষ্টি নাকরের । মানুরে নিজর স্বভাবলো কৰ্ম্ম করানি
অকরতার ॥ ১৪ ॥

ভগবান কোনআগর পাপ বা পুণ্য নাউ নেরগা । জ্ঞানে বারো
অজ্ঞানে গুরিয়া থ'র বুলিয়া জীব এতাই ভুল করিয়া মাত্ৰা-
রাতা — মি করৌরি, মি করুয়াউরিতা, মি পাপীগো মি
পুণ্যবানগো ॥ ১৫ ॥

যেতারাং জ্ঞানর মিঙাল ঙালেছে' তানুরাং হাবি অভ্জান সেচে
যারগা। তানুরাং জ্ঞান বেলির মিঙালর সাদে পরম তত্ত্বরে
(ঈশ্বররে) প্রকাশ করে দে'র ॥ ১৬ ॥

বিছা বারো বিনয় গুণে গুণী বামুন, গেই, আস্তি, কুকুর বারো
চণ্ডাল-এতা হাবি পণ্ডিতর আহিত মান্না ॥ ১৮ ॥

যেতার হুদিগং হাবিতারে সমানভাব নিংকরেছি ; তানু ইহলোকে
থায়টি জন্ম গ্রহান জয় করেছি। (অর্থাৎ তানুর আর পুনর্জন্ম
নাইতৈ) পরব্রহ্মর রূপ আকৃহান বারো নির্দোষ, উহানেতে
সাম্যবুদ্ধি যেতারাং আছে, তানু ব্রহ্মরমা আছিতাহে ॥ ১৯ ॥

হে অর্জুন, বিষয় ভোগেত্ত যেতা মুঙেই নিকুলেছে, উতা হুদা
হুঃখরকা। উতার অকরাগত্ত খামতলহান পেয়া আছে ; উতা
মেত্তমহানবকা। উহানলো জ্ঞানীয়ে উতারে হবা নাপেইতারা
॥ ২২ ॥

এজগতে, এরে দেহএগরমা যেগৈ কাম বারো সৌঅনির বেগ
এগো খাংকরে পারের, উগৈ হুত্তোমে যোগীগো — বারো উগৈ
হুত্তোমকার হারোপাগো ॥ ২৩ ॥

যেগৈ অন্তরগং মুটেইহান ভোগ করে পারের, অন্তরগং হারো-
হান পার বারো যেগর দৃষ্টিহান অন্তর্মুখী, ও যোগী উগো
ব্রহ্মরমা লীনঅয়া মুক্তি পাযারগা ॥ ২৪ ॥

মি যজ্ঞ বারো তপস্কার ফল ভোগ করোরি, বারো মি হাবির
প্রভু বারো মারূপ — এসাদে যেগৈ মোরে হারপার, তা শাস্তি
পাযারগা ॥ ২৯ ॥

ষষ্ঠ অধ্যায় অভ্যাস যোগ

নিজর লোশিংলো নিজের উদ্ধার করিছ। আত্মাএগরে সুপকরে
তলেদে নালামেইছ। নিজর আত্মা এগই নিজর মারূপ বারো
নিজর আত্মা এগই নিজর য়েকনাপাগো ॥ ৫ ॥

নিজর জ্ঞান-বিবেক-বুদ্ধিলো য়েগৈ নিজরে বশ করে পারের
উগৈ আত্মাগর মারূপগো কিন্তুমান য়েগৈ উহান না'রের তাই
তার (আত্মার) শত্রুগো ॥ ৬ ॥

য়েগৈ আত্মাএগরে জয় করে পারের, শাস্তি য়েগর মনহানাং
পালয়া থার— উগর আত্মা উগ পরমাত্মা রূপলো ঙালয়া থার।
উগৈ জার শৌকরা, হীন-ছুক, মান-অপমান হাবিতারে সমানকরে
গ্রহণ করে ॥ ৭ ॥

হে অর্জুন, য়েগৈ নিয়াম পারা ভোজন করে নাইবা সুপকরে
নাহেয়া থার, য়েগৈ নিয়াম সময় ঘুমজিয়া থার নাইবা য়েগৈ
সুপকরে নাঘুমজের, উ জনউগৈ যোগ সাধন করে নারের ॥ ১৬ ॥

য়েগৈ নিয়ম করিয়া খানা পিনা করে, কাম করে, সময়ে
ঘুমজের সময়ে হজাকঅর, উগরাং যোগ সাধন এহান সার্থক
অর বারো তারাং হীন-ছুক ককয়া যারগা ॥ ১৭ ॥

যেবাকা মনএহান নিয়াম থিং অয়তৈ, মন আকহানলো আত্মাগং
হমেয়া থার বারো নানান কামনা বাসনা এতান্ত মনহান তুরেই
অয়া থার উপেইং উ জনউগরে যোগীগো বলে পারিয়ার ॥ ১৮ ॥

বৌ নেই ফামে বর্জিগোর জিগো যেসাদে সুপ না নিকরের,
উসাদে যোগীর মন এহানৌ আত্মগরাং না নিকরিয়া জলিয়া
থানার অভ্যাস করের উগরে ও বর্জিউগর লগে পানতামন্না দেনা
য়াকরের ॥ ১৯ ॥

যেগৈ মি এগরে হাবি জীব এতার ভিতরে মোরে হারপা
পারের বারো-হাবি জীবএতা মোরাং হাপদিয়া আছি এহান
ভৌপাপারের, মি তারাং সেইক্ষাং দেহা দেউরি তারাং মোর
গুরিয়া থনারতা কিত্তাউ নাথার ॥ ৩০ ॥

যেগো নিজর হীন-ছক এতা আরার জীবর হীন ছকর লগে
তুলনা করিয়া উতারকা খালকরের ঔযোগী উগো মোর নিয়াম
নুংশিপাগহে ॥ ৩২ ॥

অর্জুনে আংকরের—

হে কৃষ্ণ, যেগৈ পয়লা পয়লা নিয়াম শ্রদ্ধা ভক্তিলো যোগাভ্যাস
অকরলো—কিন্তুমান খামতলে কোন আহান যতন নাকরিয়া
যোগ সাধন এরে দিল—এবাকাতে যোগভ্রষ্ট অনায় সিদ্ধি
অনা নারল হানতে তার গতিহান কীহান ? ॥ ৩৭ ॥

ভগবানে মাতের—

হে অর্জুন, ইহলোক বা পরলোকে কোন আকপেইং
তার বিনাশ নেই। কিয়া বুঝে, কোন আগয় কল্যান ধর্মী
কাম আহান করলে তারতা কোন দিন দুর্গতি নার ॥ ৪০ ॥

ও যোগীউগ পথগো এরে দিলেউ (পূণ্য কাম করেছে বুলিয়া)
পূণ্যবান মানু যে লোকে যিতারাগা তা ও লোকে দলাগ দিন

থায়। থাংনাং কোন সদাচার সম্পন্ন হুঙেইপা ঘরে জরম
অইতারা ॥ ৪১ ॥

অথবা কোন জ্ঞানী যোগীর বংশরমা জরম অইতপারে। এসাদে
যোগীর ঘরে জরম অনা নিয়াম ছুর্গভ ॥ ৪২ ॥

যোগী এগ তপস্বীগোরাংতো গজে ; শাস্ত্রে যেতা পণ্ডিত উতারাংতো
গজে, বারো যাগ-যজ্ঞ কর্ম যেতাই যেতাই করতারা উতারো
গজে, হে অর্জুন-উহানলো তোরে যোগীগো অনারকা মাতৌরিতা।
॥ ৪৬ ॥

যোগী এতারমা যে যোগীগো হৃদয়ৌপা ভক্তিলো মোরে আক-
মনে নিংকরিয়া সেবা করের; উগৈ হাবির গজর যোগীগো
বারো উগো মোর হুংশিপাগো হারপেইছ ॥ ৪৭ ॥

সপ্তম অধ্যায় জ্ঞান বিজ্ঞান যোগ

লিশিং লিশিং মানুষ হাদিং কদাচিং অকেইগিয়ে সিদ্ধি লাভরকা
হন্ন। করতারা। বারো উতার হাদিং লিশিং লিশিং মানুষমাউ
কচ্চিং আকেইগিয়ে মোরে হবা করে হারপেইতারা ॥ ৩ ॥

ভূমি, পানি, জি, বৌ, হাকহান, মন, বুদ্ধি বারো অহংকার
এরে আটহানলো মোর প্রকৃতি এহানরে খেই করিয়া থ'ছে ॥ ৪ ॥

হে মহাবাহু, এরে প্রকৃতি এহানর নাঙ অপরা (জড় নিকৃষ্ট ঠৈ
পালপা) এগ ছাড়া আরাক প্রকৃতি আহান আছে—উহানর
নাঙ পরা (শ্রেষ্ঠ ঠৈ পালপা)। এ জীব এতা প্রকৃতির রূপলো
হাবি জগৎহান ধরিয়া আছে ॥ ৫ ॥

ঔ পরা বারো অপরা প্রকৃতি এহানাত জীব এতাহাবি উৎপত্তি
অছিতা বারো পুঞ্জাপ জগৎ এহান সৃষ্টি বারো ধ্বংসর মূলগো
মি বুলিয়া হারপেইছ ॥ ৬ ॥

হে ধনঞ্জয়, মোরাংত ডাঙরতা আর কিত্তাউ নেই। মনির
মালাডালে যেসাদে মনি এতা লুরি আগাছে য্যালয়া থা'র
উসাদে জগৎ এহানো মোরাং য্যালয়া আছে ॥ ৭ ॥

পানিরমা মি রস, জোনাক বেলীর মিঙাল মি, বেদ হাবিরমা
ওঁকার, হাকহানাং শব্দ, মানুষমা মি নাপ্রাণ ॥ ৮ ॥

পৃথিবীর স্থংশিপা গৎ মি, জিগরমা মি মেইচাক, জীবহাবিরমা
মি ঠৈগো বারো তপস্বীর তপস্শাই মি ॥ ৯ ॥

হে অর্জুন, হাবি জীব এতার মূলগো মি, নিত্যকার কারণ মি,
মি লৌশিংপার লৌশিং বারো নাপ্পালপার নাপ্পাল ॥ ১০ ॥

পাপিষ্ঠ, বিবেকহীন ঔ তলপা মানু উতায় মোর শরণ নালৈ-
তারা কিয়াবুলে মায়ায় তানু জ্ঞানহারা অয়া হীনচাপার সাদে
ব্যবহার করতারা ॥ ১৫ ॥

হে অর্জুন, হুরারার যাতনা পাকুরা, ঈশ্বর তত্ত্ব হারপানি মনা-
কুরা ধনর প্রত্যাশী বারো জ্ঞানী—এ চারি জাতর পুণ্যাত্মা মানুরে
মোরে ভজনা করতারা ॥ ১৬ ॥

এ চারিজাতর পুণ্যাত্মারমা জ্ঞানীজন উগো মোরাং হাবির গজে ।
জ্ঞানী এতারে মি বানা পাউরি বারো জ্ঞানীয়ে মোরে নিয়াম
বানা পেইতারা ॥ ১৭ ॥

এ চারি জাতর পুণ্যাত্মা এতা হাবিয়ৌ হবা । কিন্তুমান জ্ঞানী-
জন উগো মোর আত্মা স্বরূপ (মোরাংত খেই নেই) কিয়া
বুলে তা একচিত্ত অয়া ঠৈগো এরৈদিয়া মিয়ে পরম গতি নিং
করিয়া শরণ লয়তারা ॥ ১৯ ॥

যেতা ভক্ত যে যে ছৌ লাংকরতারা, মি ঔ ছৌরমা তানুরে
নিংপা ভক্তি দিয়া দেওরি ॥ ২১ ॥

ঔ ছৌ উতারে যেতায় নিংকরিয়া পূজা করতারা তানুর বুদ্ধি
খানি কম—কিয়া বুলে, তানু ছৌর পূজা করিয়া যে যে ফল
পেইতারা—উতা মেত্তমহানরকা । ছৌর ভক্ত ছৌ পূজা করিয়া
ছৌ লোকে যিতারগা । কিন্তুমান মোর ভক্তই মোরে সেবা
করিয়া মোরেহে পেইতারা (তানুর আর পুনঃ জন্ম নার) ॥ ২৩ ॥

অষ্টম অধ্যায় অক্ষর ব্রহ্মযোগ

ঠেগো লালযারগা তাজ্জা উগৎ যেগৈ মোরে খালকরে খালকরে
লালো যিতৈগা, তা মোরে পাযিতৈগা উহানাৎ কোন সন্দে
নেই ॥ ৫ ॥

হে অর্জুন, ঠেগো লালর অস্তিম কাল উহানাৎ যেগৈ যেহান
ভাব নিংকরে নিংকরে মরণর পারে যাত্রা করের—তা ঐ ভাব
উহানেই পাযিতৈগা ॥ ৬ ॥

উহানলো তি তেৎ নায়া মোর কথা খালকর বারো যুদ্ধউ
কর। মোরাং মনহান বারো বুদ্ধিহান কাংকরলে মোরেই
পাযিতেইগা উহানাৎ হাংকৈ অনার কোন কারণ নেই ॥ ৭ ॥

যেগো তেৎনায়া একচিন্তে জনমহান মোর কথা খালকরের হাবি
সমৈত মোরেলো মগ্নঅয়া থার ঐ যোগীউগ মোরে পাযিতৈগা ॥ ১৪ ॥

হে অর্জুন, ব্রহ্মলোকেত অকরিয়া এরে পৃথিবী পেয়া হাবি
ফামর মানু আলথক-নালথক জরম আইতারা বারো মরেযিতা-
রাগা। কিন্তুমান মোরে যেগৈ পাযিতৈগা তার আর পুনঃ জন্ম
নেই ॥ ১৬ ॥

হে অর্জুন, কিসাদে সময়ে ঠে এগো লালো গেলগা যোগী এগো
আর জরম নাইতৈ বারো কীসাদে সময়ে ঠেগো এরাডিলে আলথক
জরম অইতৈ ঐ সময় দ্বিয়হানির কথা মাতিং ছন ॥ ২৩ ॥

ধূমা, কৃষ্ণপক্ষ, রাতি বারো দক্ষিণায়ণের ছয়মাহা কালএতা ছৌ
আকেইগীর অধিকারে আছে। ঔ কালে দেহত্যাগ করলে যোগী
এগো চন্দ্রলোকে গিয়া আলথক পৃথিবীরমা জরম অর ॥ ২৫ ॥

শুক্লপক্ষ, কৃষ্ণপক্ষ এদ্বিয়গী পথ জগৎ এহানর মূলহান। শুক্ল
পক্ষৎ দেহত্যাগ করলে মুক্তি—বারো কৃষ্ণপক্ষত অইলে আলথক
জরম অনা ॥ ২৬ ॥

নবম অধ্যায়

রাজবিদ্যা-রাজশূন্য যোগ

ভগবানে মাতের—

হে অর্জুন, মোর কথা এতা নিয়াম নিংকরিয়া ছন—এবাকা
তোরে অতি আচেংপা জ্ঞান বারো বিজ্ঞানর তত্ত্ব কথা ছনু-
রেইতৌ—যেতা হারপেইলে তি সংসারর বন্ধন এহানান্ত মুক্তি
পাযিতৈগা ॥ ১ ॥

বিদ্যা এহান হাবির গজর বিদ্যাহান বারো নিয়াম আচেং
পাহান। এহান অতি পবিত্র, নিয়াম হবা, হারপানি থকরহান
বারো ধর্ম সন্মত; এহানর নাশ নেই বারো ইজ্জুহান ॥ ২ ॥

হে অর্জুন, যেগর ধর্মর প্রতি কোন শ্রদ্ধা নেই—লেইকরতারা,
উতায় মোরে নাপেয়া আলথক-নালথক এ পৃথিবীত জরম অই-
তারা বারো মরতারা ॥ ৩ ॥

ছন্তোমে মাত্তে গেলৈগা জীবএতা মোরাং অবস্থান করিয়া আছিতা।
কিন্তুমান ছন্তোমেতে উহানৌ নাইগৈ। এহানেই মোর অলৌকিক
শুণহান যে—মি জীব এতা ধারণ করিয়া থউরি, পালৌরি,
কিন্তুমান মি উতারমা নেই। (মি উতারমা হমেয়া থাকুরাগো
নাইগৈ) ॥ ৫ ॥

হাকহান হাবি হাপদিয়া যেসাদে বৌএতা আছে, ঠিক ঠেসাদে
জীব এতাউ মোরে হাপদিয়া আছিতা। কিন্তুমান ঐ জীবউতার
লগে মোর কোন সম্পর্ক নেই, যেসাদে বৌ এতা হাকহানাং
থাইলেউ হাকহানর লগে কোন সম্পর্ক নেই ॥ ৬ ॥

হে অর্জুন! প্রলয় কালে জীব এতা মোর প্রকৃতি বা মায়ারমা
তিলয়া যিতারাগা। বারো সৃষ্টির তাঙ্গাগো আহিবতাই আলথক
তানুরে সৃষ্টি করৌরি ॥ ৭ ॥

মি মনুষ্য রূপলো জরম অউরি। কিন্তুমান আপাংপা উতাই
হাবি জীবর ভিতরে ঈশ্বর রূপ হার নাপেয়া লেইকরতারা।
ঐ আপাংপা উতাই নাগৈ নাগৈ কর্ম, নাগৈ নাগৈ শাস্ত্রর আশ্রয়
করিয়া মন থির করে নারতারা—ঐ কারণে তানু রাজসিক বারো
তামসিক ভাব আশ্রয় করতারা ॥ ১১-১২ ॥

বেদ বারো স্মৃতি শাস্ত্ররমা যেতা যজ্ঞর উল্লেখ আছে—উতা
মিহে। মি পিতৃ যজ্ঞ, মি হজক, মি মন্ত্র, মি যজ্ঞর ঘি, মি
যজ্ঞর জি ॥ ১৬ ॥

এ জগৎ এহানর বাপক বারো মালক অপা-বপা মি। মি
হাবিরে কর্মফল দিয়া দেউরি। মিয়ে হারপাকুরাগো মিয়ে
পবিত্র ব্রত, মিয়ে ঔঙ্কার, মিয়ে হাবি বেদ (সাম, ঋক, যজুঃ)
॥ ১৭ ॥

মি জীব এতার কর্মফল, মি য়করেকুরা বারো প্রভু। তানুর
হবা হবানেই মি চাউরি। মি হাবির মারূপ। হাবির উৎপত্তি
মোরাংত বারো বিনাশউ। এতা হাবির বিনাশহীন বীজগো
মি ॥ ১৮ ॥

যেতাই নানান কামনা সেচা বেলেয়া একচিন্ত অয়া মোর কথা
নিংকরের—তেৎনায়া উপাসনা করের—ঐ ভক্ত উগরে মি ইহ-
লোকে কল্যান বারো পরলোকে মুক্তির পথগো ইলকরে দেউরি
॥ ২২ ॥

হে অর্জুন, যে ভক্তই নিংকরিয়া আবার ছৌ লাংকরতারা তানু
হারনাপেয়া মোরেহে লাংকরতারা ॥ ২৩ ॥

যেগো মোরে নিংকরিয়া সেংপা হুদিলো পাতা, ফুল, ফল, পানি-
দিয়া লাংকরতারা মি ঔ ভক্ত উতার দান উহান নিংকরিয়া
গ্রহন করৌরি ॥ ২৬ ॥

হে অর্জুন তি যেতা কর্ম করর, প্রসাদী করর, যজ্ঞ, দান করর,
বা তপস্যা করর উতা হাবি পুংখাত মোরাং কাংকর। উহান
অইলেই কর্মর হবা হবানেই ফল উতান্ত মুক্তি পেইতেই। তি
এসাদে কর্মত্যাগ করে পারলে সংসারর বাধ এহানান্ত মুক্ত অয়া
জিংতা অয়া থাইতেই বারো মোরেউ পাযিতেইগা ॥ ২৭-২৮ ॥

মি হাবিহানরে মান্নাকরে বানাপাউরি। কোনগর গজে খেই
খেই বানাপানা বা আলিপানা কিত্তাউ নেই। কিন্তুমান, যেগই
নিংকরিয়া মোরে লাংকরতারা মি তানুরে অনুগ্রহ করৌরি।
মি তানুরে বেলা নারৌরি, বারো তানুউ মোরে বেলা নারতারা
(এহান পক্ষ পাতহান নাগৈ ভক্তির মহিমাহান) ॥ ২৯ ॥

নিয়াম লিচেংখি জনউগো যদিশৈ একচিত্ত অয়া মোর সেবা করের
তারেউ মান্নুরে সাধুগো বুলিয়া নিংকরতারা।

কিয়া বুলে, তার চেষ্টা উহান মহৎ।

ঔ লিচেং সাক্তি (কিন্তুমান মোর ভক্তগো) জন উগো হরা
অয়া ধর্মর পথগো ইলৈতৈ বারো চিরশান্তি পাযিতৈগা। হে
অর্জুন তি সুপ নাখালকরিয়া হাবিরে হুহুরাদে—মোর ভক্তর
কোনদিন ক্ষয় নেই ॥ ৩০-৩১ ॥

তোর মন এহান পুংখাক মোরাং কাংকর, মোরে ভক্তি কর
মোর নিঙে যজ্ঞকর, মোরে হমাদে। এসাদে করে মোরে শিচ্চিল
লাংকরিয়া মোরাং মনহান কাংকরলে মোরে পাযিতেইগা ॥ ৩৪ ॥

দশম অধ্যায়

বিভূতি যোগ

শ্রীভগবানে মাতের—

হে মহাপাংকালপা, মোর কথা নিয়াম নুংশি পেয়া ছনর বুলিয়া
বারো তোর সালেদে হবারকা বুলিয়া মোর মহামূল্য তত্ত্ব মাতে
নিংগা ছন— ॥ ১ ॥

জ্যো বারো মহাঋষি কোন আগউ মোর জরমর তত্ত্ব ভৌ নাপেই-
তারা। কিয়া বুল্লে, জ্যো বারো মহাঋষির বহু আগে হৌ আদি-
গং মি আছিলু ॥ ২ ॥

মোর আদিগৌ নেই, জরমৌ নেই, মি হাবি লোকর প্রভু, এ
স্বরূপ এহান যেগই হারপেইতাই উগো হাবিতা মোহ বারো
পাপেতপুরি মুক্তি অর ॥ ৩ ॥

হে অর্জুন, মানুর বুদ্ধি, বিবেক, জ্ঞান, থিং অয়া কামে লাগা-
নির বুদ্ধি, সেত্যা, ক্ষমা, ইন্দ্রিয়র সংযম, মনর সংযম, হীন-ভুক
জরম-মরণ, ডর-নাশ্বাল, অহিংসা হাবিরে মান্না করিয়া নিংকরানি,
ভূপ্তি, তপস্শা, দান, স্নানাম-তুর্নাম—এতা হাবি নানান ভাব
মোরাংতপুরি জীব এতাই পেইতারাতা ॥ ৪-৫ ॥

ভৃগুর সাদে হাতগো মহর্ষি, তানুর সনকর সাদে চারিগো মহর্ষি
বারো চৌদগো মনু—উতা হাবি মোর বৈষ্ণবশক্তি, মোর
মনাহানাত্ত জরম অছিতা। তানুর জিপুতেই এরে পৃথিবীর
মানুএতা ॥ ৬ ॥

হে অর্জুন, আদিত্য হাবিরমা মি বিষ্ণু জ্যোক্ষিকরমা মি বেলীহান
মরুদ ছৌ উতারাং মি মরীচি বারো নক্ষত্ররমা মি জোনাকহান ।
বেদরমা মি সামবেদ, ছৌরমা ইন্দ্র, ইন্দ্রি হাবিত মি মন, বারো
জীবহাবিরাং চৈতন্য ।

রুদ্র হাবিরাং মি শঙ্কর, যক্ষ বারো হিনচাপারাং মি কুবের
অষ্টাবসুরমা মি অগ্নি পর্বত হাবিত মি সুমেরু ।
পুরোহিত হাবিরাং মি বৃহস্পতি সেনাপতিরমা কার্ত্তিক পছরিরমা
সুমুদ্র ।

মহর্ষিরমা মি ভৃগু বাক্যরমা ঙ্কার যজ্ঞরমা জপরূপী যজ্ঞ অটল-
রমা মি হিমালয় পর্বত ।

গাছ হাবিরমা মি অশ্বথ, দেব ঋষিরমা নারদ, গন্ধর্ব্বরমা চিত্ররথ
সিদ্ধ পুরুষরমা মি কপিল মুনি ।

গরারমা মি উচৈঃ শ্রবা, আন্তিরমা ঐরাবত, মানুরমা মি রাজা,
অস্ত্ররমা মি বজ্র, গেইরমা কামধেনু, জন্মর মুলাধার কাম, ছপালপা
হরপরমা মি বাসুকী ।

ছনেই হরপরমা মি অনন্ত নাগ, পানির জন্তুরমা বরুণ, পিতৃ
হাবিরমা অর্যমা বারো নিয়ম রক্ষাকারীরমা মি যম ॥
হিনচাপারাং মি প্রহ্লাদ, গনকরমা কাল, পশুরমা নংসা বারো
পাহিয়ারমা গরুড় ।

বেগহানরমা মি বৌ, অস্ত্রধারী বীরহাবিত রাম, মাছরমা মকর,
ঘাটরমা মি গঙ্গা ॥ ২১-৩১ ॥

মি মারক অয়া হাবিরে সংহার করৌরি। ভবিষ্যতে সৃষ্টিয়ৌ
করৌরি। বেয়াপার মি সুনাম, হবা (শ্রী), বাণী, স্মৃতি, মেধা,
ধৈর্য্য বারো ক্ষমা এরে হাতহান দৌজেলার রূপহাননৌ মি ॥ ৩৪ ॥

সামবেদরমা বহৎসাম বুলিল এলা উতা মি। ছন্দরমা গায়ত্রী
মাহারমা আশ্রন, বারো ঋতুরমা বসন্ত ॥ ৩৫ ॥

যতুকুলরমা মি কৃষ্ণ, পাণ্ডবরাং মি অর্জুন, মুনিরমা বেদব্যাস কবি-
রমা মি গুরুাচার্য্য ॥ ৩৬ ॥

হে অর্জুন, আর হারপেয়া কিতা করতে? হুদা এহানি
হারপেয়া থাক যে, মি অংশ আক্হানলো এ জগৎএহান হাপদিয়া
থছুগো ॥ ৪২ ॥

একাদশ অধ্যায় বিশ্বরূপ দর্শন-যোগ

অর্জুনে মাতের—

তি মোরে অনুগ্রহ করিয়া যেতা আচেৎপা আধ্যাত্ম-তত্ত্ব
মাতে গেলেনা এতারমা মোর মায়া মোহ ককয়া গেলেনা ॥ ১ ॥

হে পরমেশ্বর, তি নিজর বিষয়লো যেতা যেতা মাতে গেলেনা
উতা হাবিতাউ ছত্তোমেতা। হে পুরুষোত্তম, মি তোর ঐশ্বরিক
রূপউহান দেহানিরকা নিয়াম খৌরাং অউরি ॥ ৩ ॥

হে প্রভো, তি যদি নিংকরর মি ঐ রূপউহান দেহানির যোগ,
উহান অইলে, হে যোগেশ্বর, মোরে তোর ঐ অক্ষয় আত্মরূপ
উহান দেহরাদে ॥ ৪ ॥

শ্রীভগবানে মাতের—হে পার্থ, নানান বর্ণ বারো নানান আকৃতি-
পালপা শত শত, হাজার হাজার রকম রকমর অংতা-পালপা
মোর এ আচানক রূপ দর্শন কর ॥ ৫ ॥

হে অর্জুন, তি তোর এ কাচা আহিথমলো মোর রূপ এহান
দেহানির সমর্থ নাপেইতেই। উহানেতে তোরে দিব্যচক্ষু দেওরি-
তাহে, এগীলো মোর এ ঐশ্বরিক যোগসামর্থ্য দেহে যাগা ॥ ৮ ॥

অর্জুনে মাতের,—হে দেব, তোর দেহগং মি হাবি দৌ, স্থাবর
ভঙ্গম, নানান সৃষ্ট জিনিষ, সৃষ্টিকর্তা ব্রহ্মা নান বিধর জীবাদি, দিব্য
ঋষি বারো অনন্ত তক্ষক হরপ এতারেউ দেহৌরি ॥ ১৫ ॥

তোর হাবি বারাদে দলাগআত, পেট, মেইখং বারো আহি-
পালপা অনন্ত রূপ দেহরি। কিন্তুমান, হে বিশ্বেশ্বর, হে বিশ্ব-
রূপ, মি তোর আদি, অন্ত, মধ্য, কিত্তাআহানৌ নাদেহৌরি ॥ ১৬ ॥

মুকুট, গদা, বারো চক্র হাবি বারাদে মিঙাল, তেজঃপুঞ্জ স্বরূপ
জ্বর মেইপুল বারো বেলীহানর সাদে ইঙালঙাল হাকহান, সীমা
সংখ্যা নেই আচানক মূর্তি হাবি বারাদে হাবি ফামে মি
দেহৌরি ॥ ১৭ ॥

তি অক্ষর পরব্রহ্ম, তিয়েই একমাত্র তত্ত্ব, তিয়েই এ জগতর
আশ্রয়, তিয়েই সনাতন ধর্মর প্রতিপালক, তি অধ্যয় সনাতন
পুরুষ, এহানাং মোর আর সন্দে বুলিলতা নেই ॥ ১৮ ॥

মি দেহুরি তোর আদি, মধ্য বারো অন্ত কিতাউ নেই, তোর
পাংকাল ঐশ্বর্যর পানতামরাউ নেই। লিশিং লিশিং তোর আত,
জুনাক বেলী তোর আহিথম, তোর মেইথংহানাং ইঙালঙালজি ডক্
ডক্ করের, তি নিজর তেজলো পৃথিবীহানরে তপ্তা করিয়া থহৎ
॥ ১৯ ॥

হে মহাত্মন, একমাত্র তিয়েই স্বর্গ বারো পৃথিবীর মধ্যহান এ
হাক বারো দিক হাবিউ তি হাপ দিয়া আছৎ। তোর এ আচানক
ডরপেইল মাচাক মূর্তি দর্শন করিয়া ত্রিলোক হীনপেয়া আছি ॥ ২০ ॥

ও ছৌউতা হাবি তোর ভিতরেই হমেইতে আছি। কোন কোনগ
ডর পেয়া আতজোড় করিয়া জিংতা কর, জিংতাকর বুলিয়া
প্রার্থনা করতারা। মহর্ষি বারো সিদ্ধ পালছি উতাই স্বস্তি,
স্বস্তি বুলে বুলে উত্তম স্তোত্র মান্বলো তোর স্তব করানিং
লাগেছি ॥ ২১ ॥

হে বিষ্ণু, হাকহান লাকুপা, তেজপালপা, হুদালা মেইথং, অতি
মিঙালপা অতি ডাঙর আহি পালপা তোর রূপহান দেহিয়া
মোর হৃদিগো সঙ্করানি অকরলো, মোর দেহর ইন্দ্রি হাবি বিকল
অনা অকরলো, মি মনহানরে শান্তি দেনা নারৌরি ॥ ২৪ ॥

ডাঙর ডাঙর দাত হাবিলো ডরপেইল মাচাক রূপ ধরেছৎ ।
প্রলয়র জ্বর সাধে মেইথং হাবি দেহিয়া মোর দৃষ্টি ভ্রম অনা
অকরলো । মি স্বস্তি নাপাউরি । হে দেবেশ, হে জগন্নিবাস
তাপথা অ' (মোর ডরহান সেচা দে) ॥ ২৫ ॥

রাজন্তবর্গ হাবিলো ধৃতরাষ্ট্রর জিপুতহাবি বারো ভীষ্ম, দ্রোণ,
কর্ণ, আমার মূল মূল যোদ্ধা হাবিহান তোর দাতালপা ডর-
পেইল মাচাক থতাহানর ভিতরে দাবদে দাবদে হমানিং লাগেছি ।
কোন কোনগর মূর চূর্ণ বিচূর্ণ অয়া যারগা । বারো উতা তোর
দাতর হাদিরমা যময়া আছে উতাউ দেহৌরি ॥ ২৬-২৭ ॥

যেসাদে পকু হাবি মরানির সালেদে জিগোৎ ফালদিয়া পরতারা
উসাদে মানু হাবিউ মরানির সালে দাবদে দাবদে তোর থতা-
হানর ভিতরে হমানিং লাগেছি ॥ ২৯ ॥

শৌঅনি মূর্তি পালপা তি কিসাদেগো ! মোরে মাত—হে দেব-
বর, তোরে হমা দেউরি, তাপথা অ' । আদি পুরুষ তোরে মি
হারপানি মনাউরি । তি কিসাদেগো, কিসাদে কর্ম করানিং
উবাঅসংগো মি হার নাপাউরি ॥ ৩১ ॥

ভগবানে মাতের—মি মানু ক্ষয় করেকুরা অতি ভীষণ কাল ;
এবাকা এ মানুএতারে সংহার করানিং উবা অ'ছু । তি যুদ্ধ
নাকরলেউ প্রতিপক্ষ সৈন্যদলে যেতা যেতা আহি তানু কোনগৌ
থা' নারতাই । ॥ ৩২ ॥

হানতে, তি যুদ্ধরকা উবা অ'; শত্রু জয় করিয়া যশঃ লাভ কর,
রাজ্য ভোগ কর । হে অর্জুন, মি এতারে আগেই সংহার করিয়া
হদাছুতা । তিতে এবাকাতে নাওহানমাত্র অইতেইগো ॥ ৩৩ ॥

দ্রোণ, ভীষ্ম, জয়দ্রথ, কর্ণ বারো আরার যুদ্ধবীর হাবিরে আগেই
সংহার করিয়া হদাছুগো, তি ঔ মারেছু উতারে সংহার কর ;
না ডরেইছ ; যুদ্ধরমা শত্রুপক্ষরে যেসাদেউ জিংতেই ; যুদ্ধহে
কর ॥ ৩৪ ॥

অজ্জুনে মাতের—হে দেব, আগে যেহান কোনদিনো নাদেহেছিলু
ঔ রূপউহান দেহিয়া হারো-অইলু হায়হান, কিন্তুমান ডরহানে
মনহান চয়নি অকরলো, উহানেতে হে প্রভু, তোর আগর
ধাইনাকা রূপউহান মোরে দেহরাদে, হে দেবেশ, হে জগন্নিবাস,
মোর গজে কৃপা দৃষ্টি বেলাদে ॥ ৪৫ ॥

শ্রীভগবানে মাতের—মি হারোঅয়া নিজর যোগর বলে এরে
মিঙালপা, অনন্ত, আদি, পরম রূপ তোরাং দর্শন দিলু এরূপ
এহান তি ছাড়া আর কোন আগো নাদেহেছি ॥ ৪৭ ॥

তি মোর রূপ এহান দেহিয়া হীননাপেইছ, না ডরেইছ, ডরহান
ত্যাগ করিয়া হারোপা মনে আলথক তি মোর আগেকার রূপ
উহান দর্শন কর ॥ ৪৯ ॥

মোরে যে রূপলো দেহানি পারলে ঔ রূপ উহান বেদ অধ্যয়ন,
তপস্যা, দান, যজ্ঞ কোন আকতালো দেহে নারতারা ॥ ৫৩ ॥
হে অজ্জুন, হুদা একচিত্ত ভক্তিলো উসাদে স্বরূপ হারপা পারতারা,
সেইকাং দেহানিয়ো পারতারা বারো হারপা পারতারা ॥ ৫৪ ॥

দ্বাদশ অধ্যায় ভক্তি যোগ

অজ্জুনে শ্রীকৃষ্ণের অংকরের—

আকতাই তেৎনায়া ভগবানর হাবি কর্ম করতারা বারো
সেবা করতারা । আরাক আকতাই নিগুণ ব্রহ্মর উপাসনা
করতারা—এ দ্বিয়গিরমা গজর যোগীগো কুংগো ? ॥ ১ ॥

ভগবানে মাতের—যেতাই পুংখাক মোরাং মনহান কাতকরিয়া
নিয়াম লুকের নিংকরিয়া সেবা করতারা উতারে হাবির গজর
যোগী বুলিয়া নিংকরিছ ॥ ২ ॥

যেতাই নিগুণ ব্রহ্মর উপাসনা করতারা তানু নিয়াম হীনপেই-
তারা—কিয়া বুল্লে, নিগুণ ব্রহ্মরমা মনহান থিং করানি নিয়াম
কঠিনহান ॥ ৫ ॥

তি মোরাং মনহান এককরিয়া থ, বুদ্ধি, লৌশিং মোরাং থ ।
এহান করে পারলে তি কর্মফল ভোগ করানির থাংনাং মোরে
পেইতেই—উহানাং কোন সন্দে নেই ॥ ৮ ॥

যেগরতা কোনগর প্রতি নিন্দা, মারুপানা বা দয়া, মি বুলিলতা,
দেমাক নেই, হীনে তুকে সমান, ক্ষমাবান, হারোপা, থিং
বারো মোরাং মন বুদ্ধি লৌশিং পুংখাত কাংকরেছে—উ ভক্ত
উগ মোরাং নিয়াম লুংশিপাগো ॥ ১৩-১৪ ॥

যেগো শত্রু-মিত্রেরে সমান দেহের, মান-অপমান, জার-শৌকরা,
হীন-তুক এতা সমান করে দেহিয়া থিং অয়া থার । যেগো
কোন আভ্রাত আসক্তি নেই, নিন্দা থাকাং পেইলেউ ভাব
আহানাং থার, ওরা বচন সংযত । যেতা পার উতাতেই তুষ্ট,
যেপেই-সেপেইং থানা পারের, বুদ্ধি লৌশিং থিং, ঔ ভক্ত উগো
মোরাং নিয়াম আচেৎপাগো ॥ ১৮-১৯ ॥

ত্রয়োদশ অধ্যায়

ক্ষেত্র-ক্ষেত্রজ-বিভাগ-যোগ

অর্জুনে আংকরের—হে কৃষ্ণ, প্রকৃতি বারো পুরুষ করে মাতারা ?
ক্ষেত্র, ক্ষেত্রজ, জ্ঞান জ্ঞেয় এতা কিসাদেতা ? মি হারপানি
মনাউরি ।

শ্রীভগবানে জোয়াব দেব—হে অর্জুন, এ দেহ বা কায়া এগরে
ক্ষেত্র বুলতারা । যেগৈ এহানরে হারপার, পণ্ডিত উতায় তারে
'ক্ষেত্রজ' বুলতারা ॥ ১ ॥

হে অর্জুন, হাবি ক্ষেত্ররমা মিয়েই ক্ষেত্রজ বুলিয়া হারপেইছ ।
ক্ষেত্র বারো ক্ষেত্রজর হস্তোমে জ্ঞান উহানেই মূল জ্ঞানহান বুলিয়া
নিংকরিছ ॥ ২ ॥

ঔ ক্ষেত্র এগো (কায়া) কিগো ? ঔগোর স্বভাবহান কিসাদে,
উগোর যেতা যেতা ইন্দ্রি-বিকার অ'র—উতা য়েপেইও জরম
তার, উতা সংক্ষেপে মাতে নিংগা । ঔ ক্ষেত্রজ উতাউ বা কিতা ?
উতার পাংকালহানো কিসাদে ? উতা হাবি সংক্ষেপে মাতে
যিংগা—ছন ॥ ৩ ॥

পৃথিবী, পানি এতা কিতা পাচহান মহাভূত ; অহংকার, বুদ্ধি,
প্রকৃতি দশগো ইন্দ্রি, মন বারো পাচগো জ্ঞানেন্দ্রিয়, পাচগো
বিষয়—ইচ্ছা, বিদ্বেষ, হারো, জুংখ, কায়া, চৈতন্য, ধৈর্য্য—
এতাহাবি অইলতাই ক্ষেত্র বারো তা'র বিকার—এতা তোরে
সংক্ষেপে মাংলুতাহে ॥ ৫-৬ ॥

আত্ম প্রশংসা 'নাকরানির লোশিং থনা, অহংকার নাকরানি, হিংসা
নাকরানি, ক্রমা করানি, সরল অনা, গুরুর সেবা, দেহ বারো

মনহানর পবিত্রতা থনা, দরা অনা, মনহানরে তেমেজিয়া হবাপথে
 আনানি, ইন্দ্রির ভোগ্য এতারে তেমেজিয়া থনা, 'মি করৌরি'
 এসাদে ভাব নাথনা, জরম-মরণ দুৱারা পানি এতাকিতা দুখময়
 ঘটনার দোষ বিষয়ে আলোচনা করানি, সৌজিপুত, মোয়েই,
 ঘর-দুৱার এতা কিতাত মোহ নাথনি, বা তানুর হীন-ছুক উতাত
 নিজে হীন-ছুক নাভাবানি, হবা হবানেই যেতাউ ঘটিয়া থাকু
 —উতারমা বিচলিত নাঅনা, একচিন্ত অয়া মোরে ভক্তি করানি,
 সেঙফামে থানা, মানুর লগে থানা পছন্দ নাকরানি, হাবি সন্মৈত
 আত্ম তত্ত্বর বিষয়লো আলোচনা করানি, মোক্ষ বা মুক্তি বিষয়ে
 হাবি সন্মৈত আলোচনা করানি— এতা হাবিরে জ্ঞান বুলতারাতা
 বারো এতার বিপরীত উতা হাবিরে অজ্ঞান বুলতারাতা ॥ ৭-১১ ॥

জেয় কিতারে মাত্তারা, এবাকা মাতিং শুনে যাগা। এহান
 হারপা পারলে অমৃত (মুক্তি) পাষিতেইগা। এরে জেয় বস্তু
 এহানর আদি নেই। তা পরমব্রহ্ম, তা সৎ (প্রকাশ আছে)
 বা অসৎ (প্রকাশ নাছে) কিতাউ নাগৈ ॥ ১২ ॥

ঐ ব্রহ্ম সূর্য্য বারো আরার জ্যোতিষ্ক হাবিরে মিঙাল দেৱ।
 তা আধারর (অজ্ঞানর) অতীত। তা জ্ঞান বারো তাই জেয়।
 জ্ঞান যোগে তাৱে পা'পারিয়ার। তা জীব হাবিরমা ঠৈগোঅয়া
 আছে ॥ ১৭ ॥

প্রকৃতি বারো পুরুষ, এ দ্বীয়গিরে অনাদি বুলিয়া হারপেইছ।
 গুণ বারো বিকার (পরিণাম)—এতা প্রকৃতিত জরম অর বুলিয়া
 হারপেইছ ॥ ১৯ ॥

দেহ বারো ইন্দ্রির অধীন যেতা কর্ম, উতার কারণ অইলতাই

প্রকৃতি বারো হীন-হুঃখর যেতা ভোগ উতার কারণ অইলতাই
পুরুষ ॥ ২০ ॥

এরে দেহ এগোং থায়াউ পুরুষ দেহ এগোস্ত খেই, বারো উদাসীন ।
তা কাদাত থয়া হুদা সাক্ষীগো বারো কৰ্ম করুয়ারগো, তা বিধান
করের বারো তাই পালন করের । তাই হাবির প্রভু । তারেই
পরমাত্মা বলিয়া হারপেইছ ॥ ২২ ॥

পুরুষ বারো প্রকৃতি এতার গুণাবলীরে যেগৈ ইবা করে ভৌ-
পাপারের, তা যেতা-হেতা আচার করে গেলেগাউ, দেহান্তে
তার আর জন্ম নেই ॥ ২৩ ॥

কোন কোনগো ধ্যান করিয়া মনহান সেউকরলে, ঐ মনউহানলো
বুদ্ধিলো আত্মাগো দেহে পারতারা । কোনগো বিবেক বারো
জ্ঞানলো তারে দেহে পারতারা । কোনগো কামনাশূন্য কৰ্ম করিয়া
তারে দেহে পারতারা ॥ ২৪ ॥

পরমেশ্বর হাবি জীবরমা সমান ভাবলো আছে কিন্তুমান হাবিতা
লয়ো গেলেগাউ তাতে ধ্বংস নার । তারে এসাদে যেগৈ হারপা
পারের, তাই হস্তোমে জ্ঞানীগো ॥ ২৭ ॥

হাবিকামে যে পরমেশ্বর আছে, তারে ঐ ভাবলো হারপেয়া
যেগৈ আত্মাগোরে নামারের, তা মুক্তি পাযারগা ॥ ২৮ ॥

প্রকৃতি এহানে হাবি এতা কাম করেরতা, আত্মাগো কর্তা নাগৈ,
এহান যেগৈ হারপার, তা হস্তোমে জ্ঞানীগো ॥ ২৯ ॥

হে অর্জুন, পরমাত্মার কোন কারণ নেই, কোন গুণর লগে তার
সম্পর্ক নেই—তার পরিবর্তনো নেই । তা দেহগোং থায়াউ কোন
আহান নাকরের—উহানলো কৰ্মর ফল তারাং নাথার ॥ ৩১ ॥

হাক এহানাং হাবি বস্তুএতা নাপয়া আছে ; কিন্তুমান নিয়াম
ছরুকাং বুলিয়া হাকহানাং কিত্তা আহান লাগিয়া নাথার ।
উসাদে পরমাত্মা এগো নিয়াম ছরুকাং, উহানেতে হাবি ফামে
থায়্যাউ কোন আক্কাত তা লিগু নাথার ॥ ৩২ ॥

হে অর্জুন, যেসাদে বেলী এহানে হাবি জগৎ মিঙাল করের
উসাদে ক্ষেত্রী (আত্মা) আকগো অয়াউ হাবি ক্ষেত্রে (দেহাগোরে)
ঙাল করিয়া থর ॥ ৩৩ ॥

এসাদে জ্ঞানর আহিথমলো যেতাই ক্ষেত্র (দেহ) বারো ক্ষেত্রজ্ঞর
(আত্মাগোর) তঙালহান হারপা পারের বারো জীব এতার অবিছা-
রুপ স্বভাব বারো কিসাদে করে ও স্বভাবেস্ত মুক্তি অর—যেতাই
উতা হারপেইতার, তানু পরম পদ (মুক্তি) লাভ করতারা ॥ ৩৪ ॥

চতুর্দশ অধ্যায়

গুণত্রয় বিভাগ যোগ

শ্রীকৃষ্ণ অর্জুনরে মাতে নেরগা—তো'রে হাবিস্ত পুরি শ্রেষ্ঠ জ্ঞানর
কথা বারো মাতেযিংগা । এরে জ্ঞানএহান পেয়া মুনিহাবিয়ে
পরম সিদ্ধি লাভ করগেছিগা ॥ ১ ॥

এরে জ্ঞানএহান লাভ করলে জ্ঞানীয়ে মোর স্বরূপ প্রাপ্ত অইতারা
বারো উবাকা সৃষ্টি কালেও তার সৃষ্টি না'র, বারো প্রলয়
কালেও কোন আহান ছুঃখ না'পার ॥ ২ ॥

হে অর্জুন ! প্রকৃতি এহান মোর গর্ভধানর (অর্থাৎ সৃষ্টির)
কামহান, উহানাং মি বীজ হিচে দেউরি । হাবি জীব এতা
উতান্তপুরি উৎপত্তি অইতারাতা ॥ ৩ ॥

হে অর্জুন ! মানুষর সাদে যে কোনগো প্রাণী জরম অইলেউ মি
তানুর পিতা বারো প্রকৃতি-তানুর ইমা ॥ ৪ ॥

হে মহাবীর ! সত্ত্ব, রজঃ, তমঃ— এরে তিনহানি গুণ প্রকৃতিত
পুরি জরম অছেতা । এতাহাবিয়ে নিকার লেহে আত্মাগরে
দেহগোরমা বন্ধ করিয়া থ'র ॥ ৫ ॥

হে অর্জুন ! এরে গুণ তিনহানিরমা সত্ত্ব গুণ নিম্নল । উতায়
হাবি বস্তুরে প্রকাশ করের বারো উতারমা কোন অশান্তি
নাথার । উতাই জ্ঞান বারো হারৌলো জীবাত্মাগোরে বন্ধ করিয়া
থ'র ॥ ৬ ॥

হে অর্জুন, রজোগুণ কামনা এহান খৌরাঙেস্ত পুরি জরম অ'র ।
এতাই মানুষরে কর্মর বন্ধনরমা বেরিয়া থ'র ॥ ৭ ॥

হে অর্জুন, তমো গুণ এহান অজ্ঞানেস্ত পুরি জরম অছেহান ।

এহানে জীব হাবিরে মোহ (বিভ্রান্তি) করিয়া থ'র। এতাই
অসতর্কতা, আটেলপানা বারো ঘুমলো জীবএতারে হাপদিয়া
থ'র ॥ ৮ ॥

হে অর্জুন, সত্ত্বগুণ এহানে জীবএতায় হুঃখ ছেচা দিয়া হারৌহান
আনেদের। রজোগুণে মানুষেরে কর্ম্মর পথগদে ইলকরেদের (কর্ম্মরমা
আসক্তি বরাদের) বারো তমোগুণ জ্ঞানরে গুরিয়া থয়া অসতর্ক-
তার পথগোদে ইলকরে দেৱ ॥ ৯ ॥

যেবাকা এ দেহ এগোরমা ইন্দ্রি হাবিৎ জ্ঞানর প্রকাশ অ'র
উপেইৎ সত্ত্বগুণ প্রবল অইলহান হারপেইছ ॥ ১১ ॥

হে অর্জুন, রজোগুণ প্রবল অইলে, লোভ, কর্ম্মে হেইনা, উদ্বম,
অশাস্তি, পরর দ্রব্য লনার ইচ্ছা—এতা হাবি লক্ষণ মানুষাৎ
দেহা দে'র ॥ ১২ ॥

হে অর্জুন, যেবাকা তমোগুণ প্রবল অ'র—উপেইৎ বিবেক
লৌশিং লোপঅনা, উদ্বমর, অভাবঅনা, সাবধানী না অনা, মোহ
(জ্ঞানহারা) এতা কিতা লক্ষণ দেহা দেৱ ॥ ১৩ ॥

সত্ত্বগুণ প্রবল থার উপেইৎ কোনগো দেহত্যাগ করলে—তত্ত্ব-
জ্ঞানী পুরুষ যে নির্ম্মল ফামে যিতারাগা তানুউ ও ফামে
ফৌআইতারাগা ॥ ১৪ ॥

রজোগুণ প্রবল থার উপেইৎ দেহত্যাগ করলে, তা যেতা যেতা
কর্ম্মরমা নিয়াম আসক্তি আছিল উসাদে কুল উতারমা জরম
অর। বারো তমোগুণ প্রবল থাইতে যদিশৈ দেহত্যাগ অর,
উহান অইলে তা অজ্ঞানী পশু পাহিয়ারমা জরম নেরগা ॥ ১৫ ॥

সত্ত্বগুণী মানু উর্কলোকে (দেবলোকে), রজোগুণী মধ্যলোকে
(মনুষ্যলোকে) বারো তমোগুণী জবন্ত প্রকৃতির কারণে নীচলোকে
(নরকে) আশ্রয় নিতারাগা ॥ ১৬ ॥

বিবেকবান উগর যেবাকা গুণ এহানেই কর্তা (আত্মা এগো কর্তা নাগৈ) বুলিয়া হারপা পারের বারো আত্মা এগোরে গুণা-
তীত বুলিয়া হারপার উবাকা তা মোরে পা'ঘারগা ॥ ১৯ ॥

যে মানুগৈ (জিহতা অয়া থাইতেই) এ তিনহান গুণর প্রভাব
কাপে পারের—উগৈ জন্ম, মৃত্যু, জরা বারো ব্যাধিত মুক্ত অয়া
অমৃত (মুক্তি) লাভ করের ॥ ২০ ॥

অজু'নে ঐ তাজাউগং আংকরের—প্রভু, কিসাদে কিসাদে, লক্ষণ
দেখলে হারপেইতো যে ঐ জন উগো তিনহান গুণর অতীত ?
তা কিসাদে আচরণ কর্তৈ ? কিসাদে উপায়লো তা ত্রিগুণ
অতিক্রম কর্তৈতা ? ॥ ২১ ॥

যেগো উদাসীন অয়া ধার বারো ত্রিগুণর প্রভাবে তারে অস্থির
করে নারের, গুণ এহানেই হাবি কর্ম করের মি নাকরোরি
এহান নিংকরিয়া যেগো স্থির থা'পারের অ স্থির না'র ॥ ২৩ ॥

যেগরাং হারো হুংখ মান্না, যেগো অবিচলিত । যেগোরাং মাটি,
পাথর, হুনা হাবিতাউ মান্না, যেগো হবা হবা-নেইরে সমান করে
দেহে পারের, যেগো জ্ঞানী, যেগোরাং নিন্দা প্রশংসা মান্না ॥ ২৪ ॥

যেগোর মান বারো অপমানে মান্না জ্ঞান, মিত্র বারো শত্রুরে
সমান নিংকরের কোন কর্মেই যেগোর উত্তম নেই, উগরে গুণর
অতীত বুলিয়া মান্জারা ॥ ২৫ ॥

যেগো মোরে স্থির ভক্তিলো সেবা করের, তা এসাদে গুণর
প্রভাব কাপিয়া মোক্ষ (মুক্তি) লাভ করের ॥ ২৬ ॥

পঞ্চদশ অধ্যায়

পুরুষোত্তম যোগ

যেতা'র যারো বারো মোহ নেই, যেতাই আত্ম তত্ত্ব বুরদিয়া
আছি, যেতা'র কামনা তুমিল আছে, যেতা হারো দুঃখর হাদিত্ত
মুক্ত উসাদে বিবেকবান পুরুষ উতাই ও অব্যয় পদ পেইতারা
॥ ৪ ॥

যে পদ পাগেলেগা সাধকর আর এ সংসারে আলথক আহানি
না লাগতৈ, যে পদ বেলী, জোনাক বা জ্বী প্রকাশ করানি
নারতারা উহানেই মোর পরম স্বরূপ ॥ ৬ ॥

মোর সনাতন অংশ জীবরূপে প্রকৃতিরমা পালয়া আছে, মন
বারো পাচগো ইন্দ্রিরে সংসারে বা কৰ্মর ফামে আছুলিয়া
থ'র ॥ ৭ ॥

বৌহানে যেসাদে ফুলগোর হাদির গংহানর ছরুকাং কণা হাবি
ফরদৌএয়া নেরগা ঠিক উসাদে জীব এগো যেবাকা দেহ এগো
এরেদিয়া আরাক দেহ আগং আশ্রয় করেগা, উপেইং ওতা
হাবি (মন বারো পঞ্চইন্দ্রি) লগে সালকরিয়া নেরগা ॥ ৮ ॥

জীবাওয়া, কান, আহি, চাম, নাক, জু বারো মনহানরে আশ্রয়
করিয়া বিষয় ভোগ করিয়া থা'র ॥ ৯ ॥

জীবাওয়া যেবাকা দেহএগো এরেদিয়া অন্য দেহ আগো আশ্রয়
করে, বা ও দেহউগং থা গেলেগাউ বা বিষয় ভোগ করে
গেলেগাউ বা সত্ত্ব, রজঃ, তমঃ এসাদে ত্রিগুণলো যুক্ত অয়া
থা'র—উপেইং জ্ঞানীয়ে হাবিতা ভৌ পেইতারা কিস্তমান হুদা
জ্ঞানহীন উতাই হার নাপেইতারা ॥ ১০ ॥

মি অন্তর্যামি রূপলো হাবির ঠৈগো অয়া পালয়া আছু মোরাংত
জীব এতার স্মৃতি, জ্ঞান ছলকরের বারো মিয়েই পাপীর স্মৃতি
জ্ঞান বিলোপ করে দেউরি।

মি বেদ হাবিরমা আকথুলা হারপাকুরাগো—মিয়েই আচার্য্যর
রূপ ধরিয়া বেদান্তর অর্থ করৌরি—বারো মিয়েই লৌশিংপাগো
অয়া বেদার্থ হারপাউরি ॥ ১৫ ॥

ক্ষর (প্রকৃতিয়ে হাপদিয়া থ'ছে জীবহাবি) বারো অক্ষর (কুটস্থ
নিগুণ ব্রহ্মতত্ত্ব) এ দ্বিয় পুরুষ ইহলোকে প্রসিদ্ধ অয়া আছে।
উতারমা সর্বভূত ক্ষর পুরুষ বারো কুটস্থ অক্ষর পুরুষ বুলিয়া
মাংতার ॥ ১৬ ॥

এরে, ক্ষর বারো অক্ষর এতাত্তউ শ্রেষ্ঠ যে পুরুষ তাহেই পরমাত্মা
বুলিয়া মাংতার। তা নিত্য, নির্বিকার—তা তিন লোক এহান
হাপদিয়া আছে গো—তা অব্যয় তা ঈশ্বর ॥ ১৭ ॥

কিন্তুমান, মি ক্ষর বারো অক্ষর দ্বিয় তারাংতৌ গজে ; উহানলো
মানুয়াং বারো বেদরমা পুরুষোত্তম বুলিয়া খ্যাতি অছুতা ॥ ১৮ ॥

ষোড়শোহধ্যায় দেবাসুর-সম্পদ-বিভাগ যোগ

ভগবানে মাতের—

হে অর্জুন, নাপ্রাণ থ'না, মনহান সেকরানি, জ্ঞান বারো
যোগরমা নিষ্ঠাহান থ'না, ইন্দ্রিয় এতা তুমিল করানি, যজ্ঞ,
বেদপাঠ, সরল অনা, হিংসা নাকরানি, সেতাহান ধরানি ; নাশৌ-
অনি, পরর দোষ নাদেহানি, দয়াবান অনা, লোভ নাকরানি,
আহি দরা না অনা, লাজহান হারপানি, চঞ্চল নাঅনি, ক্রমাবান
অনা, খাংকরানি গুণ থনা, ক্ষতি নাকরানি, নিজরে ডাঙর না
নিংকরানি—এতা গুণ পাইলৈব জনউগো সাত্বিক সম্পদ পায়ি-
তৈগাগো ॥ ১-৩ ॥

হে অর্জুন, যেতায় ধর্ম কর্মর ভিতরে নিজরে ডাঙর দেখরানির
—কা নিয়াম ডং-বাক্সি করতারা, দেমাক, শৌঅনি, বারো ডাট
বচনলো মাহুরে ছুঃখ দিতারা—হবা হবানেই জ্ঞান নেয়অইতারা
—উতা হীনচাপার রকতর বীজ উগলো জরম অইতারা আরো
এসাদে গুণ তামুরাং প্রকাশ পারতা ॥ ৪ ॥

তৌর (পবিত্র) স্বভাব ধাইলে মুক্তি বারো হীনচাপার স্বভাব
ধাইলে সংসার তরেইগং বলে বলে থানা। হে অর্জুন, তিতে
দৌর স্বভালো জরম অহংগহে ॥ ৫ ॥

হীনচাপা প্রকৃতির মাহু উতা ধর্ম কিহান অধর্ম কিহান হার
নাপেইতারা। তামুরাং সেং মাং, সেত্য কোনতা নাথার। তামুরাং
জগং এহান মিছাহান। ধর্ম-অধর্ম কিস্তাউ নেই, ঈশ্বর বুলিয়া
আকুতাউ নেই—মাহু এতা মুনি বেয়াপার সংযোগর ফলহান
মাত্র—আর কোন আকতা নেই ॥ ৭-৮ ॥

এসাদে লৌশিঙর মানুউতা জগৎহান ধ্বংস করানিরকা আহি-
তারাতা । তানুর মনহান নিয়াম তল. লৌশিং বাউট, কর্মউতা
ডরপেইল মাচাক—উতা জগৎহানর শত্রু ॥ ৯ ॥

তানুর আশার থুংঅনি নেই, নিয়াম অহংকারী, বারো তা'র সাদে
ডাঙর বারো লৌশিংপা নেই এভাবেলো দেমাক করিয়া চলতারা
নিয়াম অসং কামরমা লিগু আইতারা—বারো নানান মাঙ জিনি-
ষলো আরাধনা করতারা ॥ ১০ ॥

তানু মরণ কাল পেয়া বিষয় চিন্তালো খালকরিয়া থাইতারা
বিষয় আশয় ভোগ এহানেই মূলহান বুলিয়া নিংকরতারা ।
খৌরাঙর থাংনাং খৌরাঙ তানুরে কলকরিয়া থ'র । এসাদে
ভাবর অধীনে নানান অপকর্মর সুরাক চেয়া ধন পয়সা পানার
হয়া করতারা ॥ ১১-১২ ॥

এসাদে মানু উতা নিজরে ডাঙর নিংকরতারা । তানুয়াং মেঙনি
বা নলনি গুণ নেই । রূপা, মান, গৌরবর অহংকারলো নাঙ
পানার সালে শাস্ত্রর বিধান নাইলয়া যজ্ঞ করতারা । দেমাক,
পাংকাল, সাজেল, কাম এতাই বশ করিয়া মোরে নায়াকরতারা ।
মি যে হাবিরাং আছু এহানো ঠাচা নাকরতারা বারো সং
মানুরে যেহান করতারা উহানর নিন্দা করতারা ॥ ১৩-১৪ ॥

এসাদে বিদ্বেষী, হবানেই কুকর্মকারী নরাধম এতারে হীনচাপার
স্বভার দিয়া সংসারে বারো দাপেঠা দেওরি (নংশা, বাঘ,
এতা কিতা জন্তুর রকমলো দাপেঠা দেওরি) ॥ ১৫ ॥

এসাদে হীনচাপার জরম নেনার সালে তানু জনম জনমে মোরে
নাপেয়া আরাকৌ তলেদে লামে জিতারাগা (তাপ্প তাপ্প কুমি
কীট এতা কিতা অয়া জরম অয়তারা) ॥ ১৬ ॥

কাম, শৌঅনি, লোভ, এতিনহানি নরকে যানার ছুরাহানি ।
এ তিনহানি মাহুরে সর্বনাশ করে। উহালো এ তিনহানিরে
ত্যাগ করিছ ॥ ২১ ॥

যে জনগো শাস্ত্রর বিধি বিধান নাকরিয়া নিজর মন মত কর্ম
করের—তারতা সিদ্ধি নার। এ জনমেউ তার হারৌহান নেই
বারে পরকালেউ হবাপথ না'পার ॥ ২৩ ॥

উহানলো, কিহান করানি-থক—বা থক নেই উহান শাস্ত্রর বিধি
বিধানলো ইলয়া চলিছ ॥ ২৪ ॥

সপ্তদশ অধ্যায় শ্রদ্ধাত্রয় বিভাগ যোগ

অৰ্জুনে আংকরের—

হে কৃষ্ণ, যেতাই 'শাস্ত্র' বিধি নাইলয়া শ্রদ্ধালো যজ্ঞ বারো পূজা করতারা উতা সাত্বিক, রাজসিক, না তামসিক ? ॥ ১ ॥

ভগবানে মাতের—সাত্বিক মানুষে দ্বৌর পূজা করতারা, রাজসিক উতায় যক্ষ, হিনচাপার পূজা বারো তামসিক উতায় ভূত প্রেতর পূজা করতারা ॥ ৪ ॥

মানুষ স্বভাব মতে খানার আচাকৌ তিন রকমর । উসাদে যজ্ঞ, তপস্শা, দান এতাউ তিন রকমর । উতার মারেল উতা মাতে নিংগা ছন— ॥ ৭ ॥

যেতারমা আয়ু, উৎসাহ পাংকাল বারো দেহগরে হবা করে হারৌ করে বারো নুঙেইহান দে'র—যেতা নিয়াম হবা ধৌর সাদে তেলতেলা—যেতার ফল নিয়াম দিন থার—যেতা চেইলে আহিথম আছুলের—এসাদে আচাক সাত্বিক মানুষে নিয়াম মনেই-তারা ॥ ৮ ॥

নিয়াম তিতা নিয়াম চহা, নিয়াম, নুনটকা, নিয়াম তপ্তা, নিয়াম ঝাল, অতি দরা নিয়াম জেংজেঙা—এসাদে এতা রাজসিক মানুষ আচাক । এতারমা হীন ছক নুরারা জবর অ'র ॥ ৯ ॥

যেতা আচাক নিয়াম দিন আগে হংকরেছি, যেতার রস ছকেছে গং আহের, লুসি হমাং এসাদে মাঙ আচাক উতা তামসিক মানুষে নিয়াম মনেইতারা ॥ ১০ ॥

ফলর আশা নাকরিয়া, একাগ্র অয়া নিংকরিয়া, শাস্ত্রর বিধি
ইলয়া যে যজ্ঞ করতারা উতার নাং সাত্ত্বিক যজ্ঞ ॥ ১১ ॥

ফলর আশা করিয়া নিজরে ডাঙর দেহরানিরকা যে যে যজ্ঞ কর-
তারা উতারে রাজসিক বুলিয়া হারপেইছ ॥ ১২ ॥

শাস্ত্রর ব্যবস্থা নাইলয়া, দান নাকরিয়া, মন্ত্রপাঠ নাকরিয়া, দহিনা
নাদিয়া, হৃদিগৎ নিংহান নাথয়া যে যজ্ঞ করতারা উতার নাং
তামসিক যজ্ঞ ॥ ১৩ ॥

অষ্টাদশ অধ্যায় মোক্ষ যোগ

ভগবানে মাতে—

কোন কোন পণ্ডিত আকেইগিয়ে মাতারা—কর্মর নিশা এহানে
সংসার এহানরে আছুলিয়া থহে, ও কারণে হাবি কর্ম মাত্রই
সাক্তি—উহানেতে কর্ম মাত্রই এরে দেনা থক্ ।

আরাক আকতার মতে—যজ্ঞ, দান বারো তপস্যা এতা কর্ম
এরে দেনা থক্ নেই ॥ ৩ ॥

হে অর্জুন, এসাদে ত্যাগর বিষয়ে মোর মতহান মাতে নিংগা
হন - ত্যাগ এতা তিন রকমর ॥ ৪ ॥

যজ্ঞ, দান, তপস্যা এতা এরে দেনা থক্ নেই—এতা করানিয়ে
লাগের । এতারমা মনহান সেঙরতাহে ॥ ৫ ॥

হে অর্জুন, আসক্তি বারো ফলপানার আশা এরেদিয়া এতা কর্ম
করানিয়ে থক্—এহানে মোর মতহান বুলিয়া হারপেইছ ॥ ৬ ॥

নিত্যকর্ম (জপ, তপ, এতা) এরে দেনা থক্ নেই । ভুল লৌশিংলো
এতা এরেদিলে ও ত্যাগ উহানরে তামসিক ত্যাগ বুলতারা ॥ ৭ ॥

কাম এহান নিয়াম হিনহান খালকরিয়া ত্যাগ করলে ও ত্যাগ
উহানরে রাজসিক ত্যাগ বুলতারা । এহানাৎ কর্মত্যাগর কোনতা
ফল নাথার ॥ ৮ ॥

এহান মোর কর্তব্য কামহান নিংকরিয়া যেগয় হাবি সমৈত কর্ম
করের বারো ও কর্মর গজে তার আসক্তি বারো ফলর আশা
নাথার উহান অইলে ও ত্যাগ উহানরে সাত্বিক ত্যাগ বুলতারা
॥ ৯ ॥

যেগয় 'মি করোরি' ভাব এহান নেই করিয়া কর্মরমা কোন
আসক্তি নাথয়া তা এ পৃথিবীর মানু এতা নিধন কলেউ ছত্তো-
মেতে তা আথরো নামারের বারো তার কর্মর বাধহানো নাথার
॥ ১৭ ॥

হে অর্জুন, যে বুদ্ধির গুণে মানু ধর্মর পথগো ইলয়া অধর্ম
নাকরতারা— হবা হবানেই ভো পেইতারা—উরপানি বা না উর-
পানির কারণ হারপা পারতারা বারো সংসারর বাধহান মুক্তিহান
কিহান তঙাল তঙাল বিচার করে পারতারা ও লৌশিং উতাই
সাত্বিক ॥ ৩০ ॥

যেতা বুদ্ধিরমা ধর্ম অধর্ম, হবা হবানেই চিনৎ করে নারতারা
ও বুদ্ধির নাও রাজসিক বুদ্ধি ॥ ৩১ ॥

যে বুদ্ধির ফলে অধর্মে ধর্ম বলিয়া ভুল করতারা বারো হাবি-
তারে উল্টা করিয়া অর্থ করতারা উতার নাও তামসিক বুদ্ধি ॥ ৩২ ॥

হে অর্জুন, এবাকাতে তিন প্রকারর মুণ্ডেইর কথা মাতে নিংগা
ছন—যেতা আলথক, আলথক কত্তথুরুম আলোচনা করিয়া
হারো পেইতারা বারো যেতারমা সংসারর হিন ককর, যেতা
পয়লা পয়লা হর সাদে অইলেউ খামতলে অমৃত তুল্য অর—

ঔহানেই সাত্ত্বিক হুঙেই । আত্মজ্ঞানর বুদ্ধিভূপরি এসাদে হুঙেইর
সৃষ্টি অর ॥ ৩৬-৩৭ ॥

যে হারৌহান ইন্দ্রিয়লো ভোগ করলে পানা য়াকরের বারো
যেহান পয়লা অমৃতর সাদে তুল্য কিন্তুমান খামতলে ছর সাদে
প্রকাশ অর—উতাই রাজসিক হুঙেই ॥ ৩৮ ॥

যে হুঙেইহান অকরাগন্ত খাতলহান পেয়া ছদা মোহ, ঘুম
আটেলপা, কর্ম বিমুখ অনার ভাবহান সৃষ্টি করিয়া হুঙেই
পেইতার। উতারে তামসিক হুঙেই বুলতার। ॥ ৩৯ ॥

এ পৃথিবীতে থাকু স্বর্গর ছৌ পেয়া এমন কোন জীব নেই
যে এ তিন জাত প্রকৃতিজাত গুণর প্রভাবেত্ত মুক্তি পেইতার।
॥ ৪০ ॥

মন এহান পুংখাত মোরাং কাৎকরে পারলে মোর কৃপায় হাবি
এতা বিপদ তি লাল যিতেইগা । যদিশৈ অহংকারর বশে মোর
বাক্য এতা নাহনর ঔহান অইলে তোর কোন আহানাং হবা
নাইতৈ ॥ ৪১ ॥

তি যে 'মি করৌরি' বুদ্ধি এহানলো 'যুদ্ধ নাকরতৌ' বুলিল
সংকল্প এহান ধরিয়া আছৎ—এসাদে বুদ্ধি এতা ভুল । তোর
[ক্ষত্রিয়র] স্বভাবহানেই তোরে লালফামে উবা করতৈ ॥ ৪২ ॥

অর্জুন, তি ঠৈগো পুন্নাপ তারাং কাৎ করিয়া আশ্রয় ল' ।
উহান অইলে তার কৃপায় তি মহাশান্তি বারো মুক্তি পাযি-
তেইগা ॥ ৬২ ॥

আচেংপা বুলিল ঔতাত্তউ আরাকৌ আচেং এরে যেতা জ্ঞান
তোরাং বিলাদিমু—এতা কথা কুপকরে খালকরিয়া, বিচার করিয়া
যেহান হবা নিংকরর তি উহান করিছ ॥ ৬৩ ॥

হাবিস্তপুরি আচেংপা বুলিল আরাক কথা আহান এবাকা হুন
—তোরে মি নিয়ান বানা পাউরি, উহানে তোর হবারকা মাতৌ-
রিতাহে ॥ ৬৪ ॥

মোরাং মনহান কাংকর, মোরে নিংকর মোরে পূজা কর, মোরে
হমাদে। মি হুত্তোমেউ সেতা করিয়া মাতৌরিতা, তি মোর
নিয়াম হুংশিপাগো—মোর কথা ইলয়া চললে মোরে পাযি-
তেইগা ॥ ৬৫ ॥

হাবিতা ধম্ম [বারো কর্ম] উরা বেলেয়া তি হুদা মোরাং আশ্রয়
কর—তোর যত পাপ এতাত্ত তোরে মুক্ত করতৌ কোন আহান
হাংকৈ নায়া থাইছ ॥ ৬৬ ॥

এ নিয়াম আচেংপা তত্ত্ব এতা তি এমন কোন আগরাং নামাতিছ
যেগরাং তপস্শাং মন নেই, ভক্তি নেই অথবা এ তত্ত্ব এতা হুনানিং মন
হান নেই অথবা যেগৈ মোরে মনুষ্যাগো নিংকরিয়া লেইকরের ॥ ৬৭ ॥

যেগয় গীতার হুদিয়ৌপা তত্ত্ব এতা মোর ভক্তরাং ব্যাখা করিয়া
বুজা দিতৈ—এ জগৎ এহানাং ঔগরাংত জিঙে হুংশিপাতা মোরাং
আকথৌ নেই বা ভবিষ্যতেউ নাইতাই ॥ ৬৯ ॥

যেগয় মোর এ পবিত্র আলাপ এতা পাকরতৈ উগৈ জ্ঞান যজ্জলো
মোরে পূজা করের বুলিয়া নিংকরৌরি ॥ ৭০ ॥

পুংনিংহান যৌঅয়া যেগয় এ গীতার কথা এতা হুনতৈ তা মুক্ত
অয়া ধম্ম চেলপা মানু যে ফামে যিতারাগা ঔফামে তা ফৌঅ
পারের ॥ ৭১ ॥

গীতা মাহাত্ম্য

ঋষিয়ে মাতের—হে শ্রুতমুনি ! হৌ পুরাণা যুগ উহানং বেদব্যাস
নারায়ণ ক্ষেত্রত বহিয়া যেতা যেতা গীতাহানর মাহাত্ম্য গিরকরাং
মাতে গেছিলগা উতা কৃপা করিয়া মোরে হুত্বাদে ॥ ১ ॥

শ্রুত মুনিয়ৈ মাতে যারগা—আপনি নিয়াম হবাহান আংকরলে ।
কিন্তুমান গীতার গুণর কথা পানতাম্না নেই বারো নিয়াম
আচ্চেৎপা । ও কথা উতা মাতানিরমত ক্ষমতা কারতাউ বা
আছে ? ॥ ২ ॥

শ্রীকৃষ্ণই এহানর মাহাত্ম্য নিয়াম হবা করে হারপাছে । উতা
বাদে অর্জুন, ব্যাসদেব, শুকদেব, যাজ্ঞবল্ক্য বারো জনক ঋষিও
খানি খানি হারপাছি ॥ ৩ ॥

আরারতা যেতায় মাংতারা, উতা অন্তরাংত হুনিয়া খানি আহান
মাতে পারতারা । যেতাউ অক, মি ব্যাসদেব গিরকরাংত যেতা
হুনেছিলু উতা মাতে জিৎগা, হুনেদে ॥ ৪ ॥

পুংখাং উপনিষদ এতা অইলাতাই গেই স্বরূপা । শ্রীকৃষ্ণ অইল-
তাই গোপ, [সেলকম চিপেকুরা] অর্জুন অইলতাই বাছুরগো
বারো সেলকম অইলতাই গীতাশাস্ত্র রূপ অমৃত ॥ ৫ ॥

শ্রীকৃষ্ণ অর্জুনর সারথির কাম করিয়া তা গীতারূপ অমৃত
ত্রিজগতর কল্যানরকা পয়লা বিলাদিল । ও শ্রীকৃষ্ণ রূপ নর
ব্রহ্মারে হমা দেউরি ॥ ৬ ॥

সংসার রূপ স্মৃদ্ধ এহান লালনি নিয়াম হিনহান । যেগ গীতা
রূপ নৌ এগলো লালনি মনেইতারা, উগ ইলেই লেয়য়া পার
অনি পারের ॥ ৭ ॥

যেগ কতখুন্ম গীতাহান নাভামকরেছে, ঐ অজ্ঞান জন উগো
যদিশৈ মুক্তি পানা মনার উহান অইলে হরকাংশৌ আগৈ পেয়া
তারেলো আহিতাই ॥ ৮ ॥

যেগে হাবি সমৈত গীতাহান ছনের বারো পাকরের, তানু মানু
নাগৈ—তানু ছৌর লগে মানাপাতা ॥ ৯ ॥

গীতা শাস্ত্রর উপদেশর মাধ্যমে শ্রীকৃষ্ণ অর্জুনরে তত্ত্ব জ্ঞারর কথা
মাতেছিল । উতারমা আচ্ছেৎপা ভক্তি তত্ত্ব বারো সগুণ নিগুণ
ব্রহ্মর তত্ত্বও বুজাদেছিল ॥ ১০ ॥

গীতার আঠারো অধ্যায়রমা ভক্তি বারো মুক্তির কথা মাতেছি
ঐ আঠারোহান থাক্ কায়া কায়া ভক্তই তাপ্ত, তাপ্ত, প্রেম
ভক্তি কিতাকিতির কন্মর গজে থায়া মনহান সেং করে পারের
॥ ১১ ॥

এ গীতারূপ সেংপানিং হিনেইলে সাধু মানুর সংসার-পাপ সেচে
যারগা । কিন্তুমান শ্রদ্ধা নেই মানুরাং আত্তির হিনানির সাদে
বৃথা ॥ ১২ ॥

গীতাহান পাকরানি বা পাকরিয়া ছনুরানি নাজানের জন উগ-
রতা এ পৃথিবীরমা যেতা করে হাবিতাই বৃথা যারগা ॥ ১৩ ॥

উহানেতে যেগে গীতার মাহাত্ম্য হার নাপার তারাত তলপা
মানু আকগৌ নেই । তা'র মানু অয়া থানাও বৃথা তা'র জ্ঞান

ডাঙর বংশত জরম অনা, সৎচরিত্র অনার কোন আহান মূল্য
নেই ॥ ১৪ ॥

গীতার ভাবহান য়েগৈ হার নাপার তারাত অধম আর কোনগৌ
নেই। তা'র দেহ, সৎচরিত্র, ধনপয়সা বারো গৃহস্থ অয়া থা'না
—এতা হাবিরে ধিক্ ॥ ১৫ ॥

য়েগৈ গীতা শাস্ত্র নাজানে, তারাত অধম আর আকগৌ নেই।
তা যে কাম অকরেছে উতারে ধিক্, তা'র সুনাম, তা'র পূজারে
ধিক্। যদিশৈ গজর সন্মান পার উনান অইলেউ ও সন্মানরে
ধিক্ ॥ ১৬ ॥

গীতাহানাং য়েগর মনহান নেই তা'র হাবিতাউ বৃথা বুলিয়া
পণ্ডিত হাবিয়ে মাতে গেছিগা। তার গুরুরে ধিক্, তার ব্রত
তা'র নিষ্ঠা, তপস্যা, সুনাম—এতা হাবিরে ধিক্ ॥ ১৭ ॥

য়েগৈ গীতার অর্থ হার নাপার তারাত তলপাতা কুংগৌ নেই।
গীতাহানাং যেতা যেতা জ্ঞানর কথা নামাতেছি—উতা হাবি
হিনচাপার জ্ঞান। ও জ্ঞান আপ্পানেতা, উতারমা ধর্ম নাথার।
উতা বেদরমা বারো বেদান্তরমা নিন্দা করেছি ॥ ১৮ ॥

উনানেতে গীতা শাস্ত্র এহান ধর্মর ভাবলো চাপলকাছে এহানে
হাবি জ্ঞান দান করের। এহান হাবি শাস্ত্রর সার বস্তুহান
বারো পবিত্র—উহানে এহান হাবিরাত শ্রেষ্ঠ ॥ ১৯ ॥

শ্রীবিষ্ণুর পর্বদিনে বারো একাদশীরমা যেগে পাঠ করের, তা ঘুম-
জিয়াউ থাক্ বা হজাক অয়াউ থাক, আটিয়াউ থাক্ বা উবা
অয়াউ থাক্, কোন শত্রু আগৈ তারে কিত্তা আহানৌ ক্ষতি
করে না'রের ॥ ২০ ॥

যেগৈ শালগ্রাম শিলার কাদাং, তৌর মন্দিরে, শিবর মন্দিরে,
তীর্থং বা ঘাটর পারে বয়া গীতা পাঠ করের—যেসাদেউ তার
লৈপাকহান হবা অইতৈ ॥ ২১ ॥

গীতা এহান পাকরলে শ্রীকৃষ্ণ নিয়াম হারৌ অর। বেদপাঠ,
দান, যজ্ঞ, তীর্থ, পরিক্রমা, ব্রত এতা কিতা করে গেলেগাউ
অমাটিক হারৌ নাপার ॥ ২২ ॥

যেগৈ নিকরিয়া গীতা শাস্ত্র এহান পাকরের—তারাং বেদ, পুরাণ
হাবি শাস্ত্রর পাঠ অয়া যারগা ॥ ২৩ ॥

যোগর ফামে, সিদ্ধ আসনর কাদাং শালগ্রাম শিলার মুণ্ডে সং
মানুর সভাত, যজ্ঞর ফামে বারো হরি ভক্তরাং যেগৈ গীতা
পাঠ করের, তার পরম সিদ্ধি লাভ অর ॥ ২৪ ॥

যেগৈ নিকাকারলেহে গীতা পাকরের বা ছনের—তারতা দহিনা
দিয়া অশ্বমেধ যজ্ঞ করানির ফলউহান অয়া যারগা ॥ ২৫ ॥

যেগৈ গীতার ব্যাখ্যা ছনের বা অন্ততারাং অর্থ বুঝাদের বা
পাকরিয়া ছনুরাদের তা শ্রেষ্ঠ পদহান পাযারগা ॥ ২৬ ॥

যেগৈ যত্ন বারো ভক্তি করিয়া শাস্ত্রর নিয়ম করিয়া পবিত্র গীতা

অন্য আগরে দান করের, তার গৃহিনী তার মুংশিপীগো অয়া
থাইরী ॥ ২৭ ॥

তা যেসাদেউ সুনাম, সৌভাগ্য, মুরারা নেই দেহগো পাঞ্জিতৈগা
বারো তার ময়লকর শ্রদ্ধা বারো বানাহান পেয়া মুঙেইপা সংসার
ভোগ করতৈ ॥ ২৮ ॥

যে ঘরগং নিকাকারলেহে গীতার পূজা অর, সাক্তি আচারর
ফলে যেতা যেতা ছুখ অর, বা আগর শাপান্তর ফল ভোগ
করের তারাং ঔতা কিতা চেপনি নারের ॥ ২৯ ॥

ঔ ঘর উগং ত্রিপাপ দোষ বা কোন মুরারা, শাপান্ত, পাপ,
হীন, বা নরক ভোগ করানি নালাগের ॥ ৩০ ॥

যেগৈ নিকার লেহে গীতাহানর পূজা করের, তার গারিগং
কোনদিন বরণ কিতা না নিকুলের। তা শ্রীকৃষ্ণর চরণর নিংপাগো
অয়া তার চরনহানাং একনিষ্ঠ ভক্তি লাভ করের ॥ ৩১ ॥

যেগৈ আলথক আলথক গীতা পাঠ করের, তা এ জীবনে
কর্মর সালে দেহগো ধরিয়া থইলেউ হাবিতার লগে তার মারু-
পানা থাযারগা ॥ ৩২ ॥

গীতা পাঠ করের জন উগ মুক্তি পার, তা পৃথিবীর মা মুঙেই-
পাগো, কোন কর্ম আহানেই তারে সংসারে আটকা নারের।
তা যদি মহা পাপো করের তেব তারে কোনতাই সকা নারের।
থামপালর পাতাহানরে যেসাদে পানিয়ে তিঙা নারের উসাদে
পাপো তারে তিঙা নারের ॥ ৩৩ ॥

যেতা থকুনেই আচার, থকুনেই বাকা, উচিৎনেই চাকচা, যেতা সকনি পেয়া থকু নেই, সকয়লে পাপ অর, উতা হাবিতা গীতা পাঠ করানি মাত্র ককয়া যারগা। ঔজন উগ জ্ঞানে বা অজ্ঞানে ইন্দ্রিয় হাবিলো নিকারলেহে যেতা পাপ করের উতা হাবি ককয়া যারগা ॥ ৩৪-৩৫ ॥

যেগৈ গীতাহান পাকরের, তা যদি যেপেইং হেপেইং যারগা বারো যেগো হেগেরাংত যেতা হেতা দান ল'র, তেব তারাং কোন পাপে স্কো নারের ॥ ৩৬ ॥

তা যদি অশ্রায় করিয়া কোন আগরাংত পুংখাত পৃথিবী এহান গ্রহন করের, তেব আকখুরুম গীতা পাঠ করলে লিকলির সাদে সেন্ধ্যা থার ॥ ৩৭ ॥

যেগৈ হাবি সন্মৈত গীতা পাঠ করানি মনার, তা যজ্ঞ নাকরিয়াউ যজ্ঞ করেকুরা, জপনাকরলেউ জপকারী, কৰ্ম নাকরলেউ ক্রিয়াবান বারো পণ্ডিত।

তা হবা, তা নুঙেইপা, তা যোগী, তা জ্ঞানী, তা যজ্ঞ করেকুরা তা যাজক, তা হাবি বেদর অর্থ হারপা যারগা ॥ ৩৮-৩৯ ॥

যেপেইং গীতা লেরিক এহান থার, যেপেইং এ লেরিক এহান নিকা পাকরতারা, প্রয়াগ তীর্থ বারো আরার তীর্থ উপেইং বর্তমান পালর ॥ ৪০ ॥

যেগৈ নিকারলেহে গীতা পাঠ করের, তা জিংতা অয়া থাইতেউ বারো নির্বাণ অগেলেগাউ তার দেহগরে হাবি ছৌ, মুনি, বারো যোগী তারাং বাস করিয়া তা'রে কালকরতারা ॥ ৪১ ॥

যেপেইং গীতা পাঠ অর, নারদ, ঋষ ভক্ত হাবিরেল শৌরুপী
কৃষ্ণ হরা অয়া উপেইং ফৌঅয়া সাহায্য করেৱ ॥ ৪২ ॥

যেপেইং গীতার আলোচনা, গীতাপাঠ বারো পাকরুরানি অর
উপেইং ভগবান নিজে রাধারেলো হারৌঅয়া বাস করেৱ ॥ ৪৩ ॥

শ্রীকৃষ্ণই অর্জুনরে মাতেছিল—হে অর্জুন ! গীতা মোর ঠৈগো
গীতা মোর সার বস্তু, গীতাই মোর হাবির গজর জ্ঞান, গীতা
মোর নিতা জ্ঞান ॥ ৪৪ ॥

গীতাই মোর হাবির গজর স্থান, গীতাই মোর পরম পদ (মুক্তি)
গীতা মোর নিয়াম গোপনীয় বস্তু, গীতা মোর পরম গুরু ॥ ৪৫ ॥

গীতাহান যেপেইং থার মি উপেইং থাউরি, উগৈ মোর শ্রেষ্ঠ
ঘরগো । গীতার জ্ঞানর নাপ্রাণললো মি তিন ভুবন পালিয়া
থওরি ॥ ৪৬ ॥

গীতাই মোর শ্রেষ্ঠ বিদ্যা, এহানে ব্রহ্মবিদ্যা উহানাং সন্দে নেই ।
গীতাই অর্দ্ধমাত্রা, এহানে হাবির গজর বিদ্যা এহানেই বুজিয়া
মাতে নারতারা পদগো ॥ ৪৭ ॥

হে অর্জুন ! গীতার কতহান আচেংপা নাঙ ছন ।
এ নাঙ এহানি কীর্তন করলে মেত্তমহানাং হাবি পাপ সেচে
পরেৱগা ॥ ৪৮ ॥

গঙ্গা, গীতা, সাবিত্রী, সীতা, সত্যা, পতিব্রতা, ব্রহ্মাবলি, ব্রহ্ম-
বিদ্যা, ত্রিসন্ধ্যা, মুক্তি গেহিনী, অর্দ্ধমাত্রা, চিদানন্দা, ভবয়ী,
ভ্রান্তিনাশিনী, বেদগ্রয়ী, পরানন্দা, তদ্বার্থজ্ঞানমঞ্জরী গীতার

এরে নাও এহানি যেগই মনহান থির করিয়া জপ করে তা
হাবি সঁমৈত জ্ঞানে সিদ্ধ পালৈতৈ বারো নির্বান অনাব থাংনাং
পরম পদ পাজিতৈগা ॥ ৪৯-৫১ ॥

গীতাহান হাবিহান পাকরে নারিয়া আধা আহান পাঠ করলেউ
গো-দান তুল্য পুণ্য পাষিতৈগা উমানাং কোন সন্দে নেই ॥ ৫২ ॥
নিকারলেহে অধ্যায় বারো শ্লোক পাঠ করানীর ফল—
অধ্যায় ছহান অইলে—ইন্দ্রলোক ।

অধ্যায় আহান অইলে—রুদ্রলোক ।

আধা বা চারিভাগর ভাগ আহান পাকরলে সূর্য লোক ।

শ্লোক আহান, বা ছহান, বা তিনহান, বা চারিহান
বা পাচহান বা হাতহান বা দশহান নিশ্চকে নাইলে
আধাহান পাকরলেউ—চন্দ্রলোক ॥ ৫৩-৫৭ ॥

গীতাহানর আধা, চারিভাগর ভাগ আহান বা আহান শ্লোক বা
অধ্যায় আহান যদি কোনগৈ খালকরে খালকরে দেহত্যাগ করে
তা পরম পদ পা' পারিতৈগা ॥ ৫৮ ॥

যেগৈ মরণর সময় গীতার অর্থ বা গীতা পাঠ ছনের, তা মহা
পাপীগো অইলেউ তার মুক্তি অর ॥ ৫৯ ॥

গীতা লেরিক এহাত লগে থয়া যেগ' ঠৈগ' এরেদের, তা
বৈকুণ্ঠত গিয়া বিষ্ণুর লগে আনন্দ অয়া থারগা ॥ ৬০ ॥

অধ্যায় আহান মাত্র গীতাহান লগে থয়া নির্বান অইলে, তা
মানুগো অয়া জরম অইতৈ । বারো গীতাহান পাঠ করিয়া
মুক্তি পাযারগা ॥ ৬১ ॥

গীতা' গীতা' বুলিয়া মরে গেলেগা তার হবা গতি অর ॥ ৬২ ॥
 গীতাহান পাঠ করিয়া যে কোনো কাম আহান অকরলে উহানাৎ
 কোনতা দোষ নাথার ॥ ৬৩ ॥

অপা বপার আদ্র করানির সময়ত যেগৈ গীতা পাঠ করের তার
 অপা বপা নিয়াম হারৌ অইতার। বারো তানু নরকেন্ত উদ্ধার
 অয়া স্বর্গৎ জিতারাগা ॥ ৬৪ ॥

গীতা পাঠ করলে অপা বপা হারৌ অইতার। বারো আদ্রমা
 তুষ্ট অয়া তানু শৌশুমার। হাবিরে আশীর্বাদ করে করে
 পিতৃলোকে যিতারাগা ॥ ৬৫ ॥

যেগৈ গীতাহানর লগে চামর দান করের, ও দিনেই দাতাগর
 মনর কামনাহান পূর্ণ অর ॥ ৬৬ ॥

যেগৈ বিদ্বান বামন আগরে গীতাহানর লগে ছনা দান করের
 তার আর জন্ম না'র ॥ ৬৭ ॥

যেগৈ একশ হান গীতা দান করের, তা ব্রহ্মলোকে যারগা ।
 তারতা আর জরম অনা না লাগের ॥ ৬৮ ॥

গীতাহান দান করানির ফলে দাতা হাতহান কল্প পেয়া বিষ্ণু
 লোকে বিষ্ণুর লগে হারৌ অয়া থার ॥ ৬৯ ॥

যেগৈ গীতাহানর ব্যাখ্যা হবা করে ছনিয়া ও লেরিক উহান
 দান করের । শ্রীকৃষ্ণ হারৌ অয়া তার মনর আশা পূরণ করে
 দেয় ॥ ৭০ ॥

যেগৈ অমৃত পালপা গীতাহান না পাকরের বা নাছনের, তা
আতহানাত থাছে অমৃত বেলেয়া ছপিনাং লেপছেগো ॥ ৭১ ॥

সংসারর ছুংখ, তাপিহ হীন পেয়া যদি গীতার জ্ঞান লাভ
করে পারের, উহান অইলে গীতারূপ অমৃত পিয়া ভগবানরাং
ভক্তি কাংকরিয়া হুঙেই অর ॥ ৭২ ॥

এ পৃথিবীং জনক রাজার সাদে আরাকৌ রাজা গীতা পাঠ
করিয়া পাপেহ মুক্ত অয়া পরম পদ পাগেছিগা ॥ ৭৩ ॥

গীতার জ্ঞান বিষয়ে হরুকাং ডাঙর কোনতা চিনং নেই, (হারিয়ে
এ জ্ঞান এহান লাভ করে পারতারা ।) হাবি জ্ঞানরমা গীতার
জ্ঞান হানে হাবির গজে, এহান ব্রহ্মজ্ঞানর লগে মান্না ॥ ৭৪ ॥

মি হারপাউরি, মি করৌরী, এসাদে ডাঙরসানা বা দেমাক
করিয়া যদিশৈ কোন আগৈ গীতাহানর অপমান করের—প্রলয়
নাছে যংবধি তা নরকে বাস করের ॥ ৭৫ ॥

যেগ' অজ্ঞান অয়া, বা অহংকারর মোহে গীতা নায়াকরের
উগ' কল্প আহান লয় নাছে পেয়া কুন্তীপাক নরকে পচিয়া
মরের ॥ ৭৬ ॥

যেবাক গীতার ব্যাখ্যা করানি অর উপেইং যদি কোন আগৈ
কাদাং থায়াউ ছনানি না মনার উহান অইলে তা কতধুরুম
হয়রগো অয়া জরম অর ॥ ৭৭ ॥

যেগৈ গীতাহান চর করিয়া আনের, তারতা হাবিতাউ বৃথা ।
গীতা পাঠ করিয়া কোন ফল নাথার ॥ ৭৮ ॥

না খাল করিয়া কাম করলে তার কাম যেসাদে বৃথা অর, গীতার
ব্যাখ্যা যেতাই ছনিয়া কোনতা বুড়েই নাপেইতারা, তানুরতাউ
কোন কামে ফল নাথার ॥ ৭৯ ॥

গীতা পাঠ ছনিয়া ছনা, খানার আচাক, পটুবস্ত্র এতা কিতা
দান করানির কা ভগবানরে নিংকরিয়া কাংকরিঅ ॥ ৮০ ॥

গীতা পাঠ করের জনউগরে ফুতি বারো নানান জিনিষলো পূজা
করলে ভগবান উহানাতেই তুষ্ট অর ॥ ৮১ ॥

এতা কথা নাতিয়া স্মৃত মূনিরে বারো আলথক করে নাভের—
এ গীতার নাহাঅ্য এহান পুরানাহান, এহান শ্রীকৃষ্ণই নিজে
নাতেছিলহান । গীতহান পাঠ করিয়া খানতলে যোগে এর
নাহাঅ্য এহান পাকরের, তা গজর ইকরা ফলর কথা মতে
হাবিতা ফল পাযিতৈগা ॥ ৮২ ॥

যোগে গীতা পাঠ করিয়া গীতার নাহাঅ্য নাপাকরের তার
গীতা পাঠ বৃথা—ছদ্দা পরিশ্রম উহানে সারহান অর ॥ ৮৩ ॥
যোগে গীতা হানর লগে লগে গীতার নাহাঅ্যউ পাকরের বারো
নিংকরিয়া ছনের, তারতা শ্রেষ্ঠ গতি অর ॥ ৮৪ ॥

যোগে গীতার ব্যাখ্যা ছনিয়া লগে লগে নাহাঅ্যউ ছনের ও
পুণ্য ফল ইলয়া সংসারর হাবি বুড়েই পাযারগা ॥ ৮৫ ॥

ইতি শ্রীবৈষ্ণবীয় তত্ত্বসারোক্ত গীতা নাহাঅ্য সম্পূর্ণ ।



বানান এসাদে ভ্রনা থকছিল :

লাল	চুম	পৃষ্ঠা	শ্লোক
বুলি লভাব	বুলিল ভাব	১২	॥ ৩০ ॥
সূর্য্য	সূর্য্যয়	১৫	॥ ১ ॥
মহু	মহুরে	১৫	॥ ১ ॥
ঙালেছে	ঙালছে	২০	॥ ১৬ ॥
মেতুমহানবকা	মেতুমহানরকা	২০	॥ ২২ ॥
নিজের	নিজরে	২১	॥ ৫ ॥
কীসাদে	কিসাদে	২৬	॥ ২৩ ॥
যোগ	যোগা	৩৪	॥ ৪ ॥
নান	নানা	৩৪	॥ ১৫ ॥
দলাগআত	দলা'গআত	৩৪	॥ ১৬ ॥
অধ্যয়	অব্যয়	৩৫	॥ ১৮ ॥
থা'পারেরহ	থা'পারের অস্থির	৪৫	॥ ২৩ ॥
সৃষ্টি	সৃষ্টি	৫৫	॥ ৩৯ ॥
তব্ব	তব্ব	৫৮	॥ ১০ ॥
শাক্তর	শাক্তর	৬০	॥ ২৩ ॥

